

Эрнст Модерзон

Шайтанның шырмауында

*Теріс жолға азғырылмауларың үшін қалғымай
дұға етіңдер. Матай 26:41.*

Мазмұны

Алғы сөз	7
Бұл кітапты жазуға неге бел байладым	9
Киелі Жазба не дейді?	17
Балаларды құрбандыққа шалу	18
Бал ашу	19
Белгілер мен құбылыстарды пайымдау	22
Сиқыршылық, көз байлаушылық	26
Аруақтарды шақыру	32
Оккультизмнің кейбір түрлері	39
Сүйелді дуалау	39
Тіс ауруын және басқа ауруларды дуалап оқыту	43
Құтқарылу мейрамының суы және емдеудің басқа да магиялық тәсілдері	47
«Аспан» хаттары мен «отты» хаттар	50
Мұсаның 6 және 7- кітаптары	51
Сиқыршылықтың салдары.....	54
Сиынғанда қуаныштың болмауы.....	56
Жан тыныштығының жоқтығы	58
Өзін-өзі өлтіру туралы ойлар	59
Қырсық ойлар	63
Құдайдың Сөзін түсінбеушілік	72
Өлім туралы ойлар	73
Картамен бал ашу және оның зардабы	76
Спиритизмнің нәтижесі	77
Ыдыс айналдыру	79
Магнетизм	84
Қауіпті тәжірибелер	86
Көз байлау (гипноз)	90
Теософия	92
Спиритуализм	94
Астрология	96
Оккультизмнің езгісінен қалай құтылуға болады?	98
Күнәні мойындау	99
Тәубеге келу – сананың өзгеруі	100
Сенім және сиыну	101
Мінажатпен қолдау	102
Ораза тұту	103

Қол қойып сиыну	104
Алғыс айту	105
Исаның атын атап шақыру	106
Құдайға қарсы ойларды айтпау	107
Сиқыршылықтың заттарын және кітаптарын құрту ...	108
Киелі кітапты тұрақты түрде оқу	109
Дұға етудегі тұрақтылық	110
Құдай балаларымен қарым-қатынаста болу	112
Құдаймен одақ құру	113
Аудармашының соңғы сөзі	114

АЛҒЫ СӨЗ

Мен бұл кітапта оккултизм саласындағы ғылыми зерттеу жұмысының нәтижелерін келтіруден аулақпын. Менің алдыма қойған мақсатым – түрлі арбау амалымен қапыда шайтанның шырмауына түсіп қалып, енді содан қалай құтылудың жолын білмей дал болған адамдарға қол ұшын беру. Міне, осындайларға шын ниетіммен көмектесіп, ақыл қосып, тыныштыққа апаратын азаттық жолын көрсетсем деймін. Сонымен қатар ырымға беріліп шайтанның торына түсіп қалған, бірақ мұнысынан бейхабар қаперсіз жандарға да көмектескім келді. Мұндай адамдарға карта ашу, астрология, сәуегейлік, дуалау, көз байлау, магнетизмнің арты жақсылыққа апармайтынын түсіндіруге және көрсетуге тырыстым. Бұлардың қара түнектің өктемдігінен құтылуға талпыныс жасау сезімін оята алсам, ойымның жүзеге асқаны деп білемін. Үшіншіден, Құдай Сөзін уағыздаушыларға да көмек беруді ойладым. Амал не, кең атақ алған сиқыршылықтың күнә екендігі туралы аз айтылып жүр. Көптеген адамдардың Құдайға жол таба алмай, адасып жүрулерінің себебі де дәл осыдан.

Мен өз басынан өткен тәжірибелерге сүйеніп айтқан куәгерлерге көбірек сөз беруге тырыстым. Өйткені, сөзбен ұқтырудан гөрі айғақпен айтқан ұтымдырақ болатыны белгілі.

Жоғарыда айтылған мәселелер төңірегінде «Тәңір алдындағы киелілік» атты апталық газетте мақалаларым жарияланғаннан кейін, мен адамдардан көптеген хаттар алдым. Хат иелері өмірлерінде өзгеріс болмау себептерінің сырын енді ғана түсінгендерін жазыпты. Мен осы кітаптың көпшілікке шапағат беріп, қараңғы қапасқа сәуле түсіріп, көптеген адамдарға өздерінің бұғауда екендерін сезініп, Құдайдың ғажайып дүниесіне қол созуларына мүмкіншілік беруін қалар едім.

Эрнст Модерзон, Бад-Бланкенбург 1924 ж.

Мен неліктен осы кітапты жазуға бел будым?

Осыдан бірнеше жыл бұрын Элиас Шренктің уағыздарын тыңдаған едім. Ол сиқыршылықтың күнә екендігін және бұл істе Құдайдың есімі жиі қолданылатындығы туралы айтты. Сонда мен іштей: “Ол бұл туралы неге көп айта береді? Біздің заманымызда мұндай істермен айналысушылар жоқ қой. Шынымен-ақ әлі де бақсы құшынаштар мен сиқыршыларға сенетіндердің бар болғаны ма? Біздің қазіргі жаппай сауаттанған кезімізде ырымшылдыққа жол берудің жөні жоқ қой” – деп ойладым.

Бірақ мен көп кешікпей жан қамқорлығы ісінде біртіндеп тәжірибе жинақтай бастадым: бұл істе қауым қызметкерінен гөрі сапардағы уағызшының мүмкіндігі мол. Маған көптеген адамдар келіп, өздерін еріксіз Құдайға тіл тигізуге итерме-леген қара күштер туралы айтып шағымданатын. Олардың ойларына жүректен шықпаған сөздерді өзезіл тықпалағандай сезінеді. Бір белгісіз қара күш олардың ойларында Құдайға қарсы ойларды туындатады. Құдайға, дәлірек айтқанда Киелі Рухқа қарсы мұндай ойлар әсіресе олар мінәжат етуге, Киелі кітапты оқуға немесе жиналысқа баруға дайындалған сәттерде пайда болады.

Мен осы жайға душар болған адамдармен жақынырақ сұхбаттасқанда, олардың жас кезінде немесе балалық шақтарында “дуаланғандары” анықталды. Сірә, қарт Шренктің жиі айтқандары дәл осының өзі болса керек. Бірақ та сол кезде мен Құдайға қарсы ойлардан азап шеккен адамдардың бұрынырақта дуамен қатысы болғандықтарына жәй ғана кездейсоқтық деп қарадым.

Мұндай жайттардың жиі кездескені сондай, мен мұнда бір ішкі байланыс бар болар деп күдіктене бастадым. Айтса айтқандай, дуалау Құдайға тіл тигізуге алып келеді екен. Маған мұның түсінікті болғаны соншалықты, Құдайға тіл тигіздім деп айтушылардың сөзінің соңын тоспай-ақ оларға: “Сіз жас кезіңізде дуалаушыға барғансыз ғой?” – деп нық сеніммен айтатын болдым. Олар көбіне: “Оны қайдан білдіңіз?” – деп үрейлене, әрі таңдана сұрайтын. Мен оларға өзімнің

уағызда тәжірибемде ондайларды көп кездестіргенімді және Құдайға тіл тигізу әрқашан да сиқыршылық, яғни дуалаудың салдарынан болатынын айтатынмын. Кейбіреулер ештеңе білмейтіндерін тілге тиек етіп, азар да безер болды. Сонда мұндайларды анық-қанығын шешесінен сұрап біліп келуге жіберетін болдым. Ал оның нәтижесі көбіне дерлік: “Иә, сондай болыпты”, – деумен аяқталатын.

Ал ата-анасы қайтыс болған немесе олар дуалаудың болғанын мойындаудан үзілді-кесілді бас тартқан жағдайда мұны дәлелдеу қиынға түсетін. Бірақ осы байланысты жиі кездестіргенім сондай, тіпті оны дәлелдеу мүмкін болмаған жағдайдың өзінде мен дуалаушылықтың қатысы барлығына шүбә келтірмейтін болдым. Тіпті кейде ата-аналары болған істі жасырып, арбаушымен ешқашан араласпағанын айтып ант-су ішетіндері бар. Мұндайда балаға көмек бола ма деген ниетпен босандырып алушы жаңа туған сәбиге дуа оқыған. Тюрингиядағы бір деревняда босандырушы әжей ондаған жылдар бойы әр жаңа дүниеге келген нәрестеніі дуалаған.

Уақыт оза келе тағы да бір шындыққа көз жеткіздім. Менің жан тыныштығын қажет еткен адамдармен жиі әңгімелесуіме тура келетін. Оларға рақымшылықты көрсетіп, Құтқарушыға сенім арту керектігін айттым, бірақ амал не, көбінің талпыныстары мен мінәжаттары нәтижесіз болып, олар сенімге келе алмады. Дуалау олардың тәубеге келулеріне кедергі келтіретін.

Көпшілігі тәубеге келгенімен, шынайы тыныштыққа ие бола алмады. Оларды қайтадан: “Мен шынымен-ақ қабылдандым ба? Құдай менің күнәларымды шынымен кешірді ме?” деген күдікті ой басты. Олардың құлағына әлдекім: “Ондай ойдан аулақ бол. Сен қабылданған жоқсың және өлімге душар боласың! Барша талпыныстарың бос әурешілік!” – деп үнемі сыбырлап тұратындай сезім пайда болған.

Содан соң көріпкелдікке сенген-сенбегендеріне қарамастан, балгерлерге өз болашағын білу ниетімен карта ашуға ерік берген адамдармен де дәл осындай жағдай болады деген тұжырымға келдім. Бұл тіпті әзіл үшін аштырған

күннің өзінде де әлгі нәтижеге әкеледі. Киелі кітап курсында болған оқиғаны ешқашан ұмытпаспын деп ойлаймын, орайы келіп тұрғанда соны сіздерге де айтып берейін.

Бір жас жігіт шын пейілімен Құдай жолына түсуге ниеттенеді. Ата-анасы сенуші болғандықтан, ол өзінің де тәубеге келуі керектігін білетін. Мен оған сенімге апаратын жолды нұсқап, екеуіміз бірігіп мінәжат еттік, бірақ онымыздан ештеңе шықпады! Біз қайтадан әңгімелестік, бірақ бәрі бекерге кетті – мен дйттеген мақсатыма жете алмадым. Сонда курсымызда оқитын тәжірибелі бауырластан бізбен бірге мінәжат етуге шақырдық. Бірақ ол да сол мақсатқа жетпеді. Үшінші бауырластың да көмегі нәтиже бермеді. Сонда мен әлгі жігіттен оның арбаушымен араласы болған, болмағанын сұрадым. Ол мұның мүмкін емес екенін, ата-анасы сенуші адамдар болғандықтан, олардың мұндайға жол бермейтіндіктерін айтты. “Ал өзіңнің қатысың болған жоқ па?” – деген сауалға ол студент шағында карта ашушыға барып, болашағын айтып беруді сұрағанын күле отырып есіне алды. Сонда мен оған: “Міне, сенім жолына түсе алмай жүруіңнің себебі осы. Сен қара күштердің ықпалынан шыға алмай жүрсің”, – дедім. Бұған сене алмаған жас жігіт күліп: мұның себебінің осы болуы мүмкін еместігін айтты. Жас жігіт менің кеңестеріме құлақ аспады, сөйтіп өз жанына тыныштық таба алмай үйіне қайтты.

Осындай жайларды өте көп кездестіргендіктен, мен өз уағыздарымда осы мәселе туралы жиірек айтатын болдым. Сөйтіп, ертедегі бақташы Шренк секілді, менің де тыңдаушылардың назарын осы мәселеге аударуыма тура келді. Соның нәтижесінде осы күнәнің шырмауында жүргенін айтып, шағым жасаған адамдар менімен сөйлесуге көптеп келетін болды. Арбаушымен араласқан адамдармен көбірек кездескен сайын, бұл туралы газетке кеңірек жазудың қажет екенін сезіндім. Соның нәтижесінде маған осы күнәні мойындаған хаттар көптеп келе бастады. Қазір күн сайын дерлік әлдекім ауызша немесе жазбаша түрде осы мәселемен бөлісетін болды.

Жан қамқорлығы тәжірибесінен білетінім бойынша

айтсам, өзәзілдіктің сұмдық күнәсі адамдардың арасында кең тараған және осы күнәнің азабын арқалап, шайтанның шырмауынан шыға алмай жүргендері қаншама. Адамдарға қамқоршылық жасаушылардың бұл тұралы аз айтатындарына және басылымдарда оккультизм мәселелері жарық көрмейтініне таңдануға тура келеді. Дуалауды халық медицинасының тәсілі деп есептейтіндер шайтанның билігінде болып табылады. Мәселен, ауырған кезде немесе сүйелден арылу үшін адамдардың көпшілігі дәрігерге барудың орнына “көмектесе алатын”, “ауруды дуалай алатын” балгерлерге баратын жайлар көптеп кездеседі. Және оның көп жағдайда септігі тиеді. Сондықтан да көпшіліктің пікірінше дуалау залалсыз, тіпті, ізгі іс болып есептеледі. Әсіресе, мұндайда Құдай Үштігінің есімдері қолданылса, тіпті ерекше!

Балгерлерге барушылар ғана емес, өздері осымен айналысатындар да солай деп есептейді. Олар бұл пайғамбарлар қалдырып кеткен киелі кітапқа сай көне емдік тәсіл, мұны сиқыршылық және күнә деп санайтындар тәубелеріне келулері қажет деседі. Бірақ мен дуалауды сенімнен, Құдаймен қатынастан және мәңгілік өмірден ада ететін ауыр күнә екенін саналы түрде айтамын. Дұшпанның шеберлігі бұл күнәні зиянсыз, онымен қоймай құрметті және киелі кітаптық деп бейнелеуінен көрінеді. Шын мәнісінде, бұл барып тұрған күнәнің өзі, мұны Құдай Сөзі айыптайды және қатал түрде жазалайды.

Жоғарыда келтірілген жайттарды ой елегінен өткізе отырып, мен осы салада жинаған азды-көпті тәжірибемді өздеріңізбен бөліссем деген шешімге келдім. Әлі де адамдардың көпшілігі мұны күнә деп сезінбейді, сондықтан өздерінің өмірлеріндегі ақылға қонбайтын әдеттен тыс жағдайлардың болу себептерінен, неге қуанышқа кенеліп, жан тыныштығын ала алмай отырғандарынан бейхабар. Мен мұндайларға былай дер едім: “Қараңдар! Оның себепсалдары мынау! Қашан сіздер тәубеге келіп, мұны күнә деп мойындамайынша, шайтанның шырмауынан шыға алмайсыздар”.

Ойымда адамдарға жан қамқорлығын көрсетушілерге де көмектесу бар. Жоғарыда аталған күнелардың ішінде жасырынған қара ниетті күштің бар екенін адамдардың көпшілігі біле бермейді. Бақташылар оларға бұл туралы айтпайды, сондықтан да көптеген адамдар өздерін қинап жүрген кесәпаттың түп-тамыры осы күнәдан бастау алғанын түсінбейді.

Ұзақ жылдар бойы Ізгі хабар таратушы қызметін атқарғандықтан, Құдай Сөзінің таралуына шайтанның барынша кедергі жасап бағатыны маған көптен мәлім. Елшілік қызметпен бір жаққа жиналсам-ақ болды, аяқ астынан өзім немесе жақындарымның бірі науқастанып қалып, қызметіме кедергі жасайтын жағдайлар басымнан жиі өтті. Әрбір ізгі хабар тарату шарасы шайтанның билік құратын аймағына қол сұғу болып табылады және ол бұған кедергі жасау үшін қолынан келгеннің бәрін істеп бағады. Бірақ дұшпан менің жолыма қаншалықты үлкен кедергі жасаса, алдағы жұмыстан соншалықты мол рақымдылық күтуге болатын.

Елүкүндік мейрамында орман ішінде өткен жиналыстардың бірінде үш қызметкер: “Киелі Рух келген кезде, Ол әлемді әшкерелейді” деген тақырыпта уағыз айттық. Біріншісі – “Маған сенбеу – күнә”, екіншісі – “Мен Әкеме бара жатырмын” деген тақырыпта сөйледі. Ал маған “Сот туралы, осы әлемнің билеушісінің әлдеқашан сотталып қойғаны туралы” уағыз айтуды ұсынды. Мен Құдайдың Фолғотада шайтанды биліктен айырғаны туралы және шайтанның сотталған және жеңіліс тапқан билеуші екендігі туралы шабыттана куәлік бердім.

Осыдан кейінгі апта мен үшін қалай болды десеңіздерші! Қандай ғана азғыруларды басымнан кешірмедім! Бірақ, Құдайға тәубе, Оның арқасында аман қалдым, Ол өзіне тән мейірбандығымен маған көмектесті. Ал шайтан болса, мені торына түсіру үшін қандай сұрқия істерді қолданбады десеңізші! Сонда мен мынаны түсіндім: біз шайтан туралы айтқанда және оның жеңілгенін ауызға алғанда, өзөзілдің өзімен айқасқа түседі екенбіз. Мен осы еңбегімде Киелі кітаптың сиқыршылықтың күнәсі туралы және шайтанның

шырмауынан қалай құтылуға болатыны жөнінде не айтатынын көрсетіп, қуәлік еткім келеді.

Құдай бұл кітапты жарылқаушылық құралы ретінде қолдана көрсін, шайтанның шырмауына іліккендер Тәңіріміздің еркіндік қуанышына кенелсін!

Киелі Жазба не айтады?

Бұл тақырып Киелі Жазбаның көптеген орындарында қарастырылады. Заңдарды қайталау кітабының 18-тарауының 9-14-аяттарына қарайық. Бұл жерде Құдай Мұса арқылы Исраил халқына олардың Қанахан жеріне келген кезде ұстанып жүрулері тиіс ережелерді береді: “Сен өзіңнің Құдайың Тәңір берген жерге аяқ басқанда, сондағы тұратын халықтың жасағанындай жексұрындықты үйренуден сақ бол. Сенің араңда ұлын немесе қызын оттан өткізуші, сәуегей, бал ашушы, көріпкел, арбаушы, ырқына көндіруші, аруақ шақырушы, сиқыршы немесе аруақтармен тілдесуші болмауы тиіс. Өйткені мұны жасаушылардың бәрі Тәңір алдында жексұрын саналады, сондықтан сенің Құдайың оларды сенің араңнан қуады. Өз Құдайың Тәңірдің алдында пәк таза бол. Өйткені, мен қуайын деп отырғандар бал ашушылар мен сәуегейлерді тыңдайды, ал сенің Құдайың Тәңір саған ондайға жол бермеген”

Бұл жерде Құдай алдында жексұрын қылық болып саналатын күнәлардың тізімі берілген. Біздің көз алдымызға сиқыршылық пен балгерліктің қорқынышты әлемі мен суреті келеді. Құдай мұндай істермен айналысуға айқын да анық тыйым салады.

Балаларды құрбандыққа әкелу

Біріншіден, исраилдіктердің арасында “өз балаларын оттан өткізушілер” болмауға тиіс екендігіне нұсқау берген. Бұл нені білдіреді? Исраил халқы келуге тиісті елде өз балаларын Молохқа құрбандыққа шалатын сұмдық әдет-ғұрыптар болды.

Әдетте тұңғыш балалар құрбандыққа шалынатын. Молох мүсінінің ортасы қуыс болатын да, соған от жағылатын. Әбден отқа қызған пұттың қолына сәбилерді салып, олар ауыр азаппен өлетін. Құдайдың сыйлығы – балаларды жансыз бір тұлға үшін құрбандыққа шалу қандай ауыр күнә десеңші?! Осы бір сұмдық әдет-ғұрып жиіркенішті болып көрінгенімен, бұл исаилдіктер арасында да кездесетін жағдай еді. Бұл туралы біз Патшалықтар туралы 4-жазбаның 17:17-аятынан оқи аламыз. Біздің алдымызда өз қылықтары үшін Ассирияға тұтқынға берілген Исаил халқының тарихы ашылады. Онда: “Өздерінің ұлдары мен қыздарын от арқылы өткізіп, бал аштырып, көз байлатып, Тәңір алдында істемейтінді істеп, Оны ашуландырады” делінген. Мұндай сұмдық жағдайлар Исаил халқында ғана емес, Солтүстік патшалықта да болды балаларды құрбандыққа әкелетін Молохтың тас мүсіні бар Яһудеяда да орын алды. Тіпті Яһудея патшасы Ахаздың өзі: “Тәңір Исаил ұлдарының арасынан қуған халықтың жексұрын ісіне еліктеп, өз ұлын оттан өткізді” (4Патш. 16:3). Бұл жерден біз Құдайдан қорқатын Езекия патшаның ұлы Манассия туралы да оқимыз: “Ол да өз ұлын от арқылы өткізді, бал ашты, өзінің жанында аруақтарды шақыратындарды, сиқыршыларды ұстады; Тәңірді ашуландыру үшін Оның көз алдында көптеген жамандықтарды істеді” (4Патш. 21:6).

Қазіргі күндері де әлі дүниеге келмеген балаларды құрбандыққа шалу оқиғалары өте жиі кездеседі. Осы күні жасанды түсік жасатып, Құдайдың рақымдылығы болып табылатын балаларды өлтіру біздің тарихымыздағы қара таңдақ болып табылады. Қазір адамдар балаларға Құдайдың сыйы емес, мойынға ілінген қамыт ретінде қарайды. Бұл салада дұшпан әлі де өте күшті!

Сәуегейлер

Заңдарды қайталау кітабының 18-тарауынан біз сол кездегі бал ашушылықтың күнәсі туралы оқимыз. Онда сәуегейлер, бал ашушылар, түс жорушылар және т. б. жөнінде айтылады. Сонда бұлар кімдер? Целлердің

«Киелі кітап сөздігінен» мынандай жолдарды оқимыз: “Бал ашушылар түрлі әдістерді қолдана отырып, біздер үшін беймәлім рухтар әлеміне еніп, қара ниетті шайтан күштерімен байланыс жасайды”.

Адамдар сәуегейлік жасауға қалай жетті? Адам жүрегінің түкпірінде болашақтың құпиясын ашсам-ау деген тілек жасырынып жатыр. Көптеген адамдар алдағысын болжауды, өздерін не күтіп тұрғанын білуді армандайды. Бұл сұрақтарға Құдай Өзінің Сөзі мен Киелі Рухы арқылы жауап береді. О дүние және болашақ туралы білуге тиіс нәрселерімізді бізге Киелі кітап ашып береді. Одан біз Құдай балалары болғандықтан Мәсіхпен бірге Оның мұрагерлері болатынымыз, егер біз үшін шындық салтанат құратын жаңа жер мен жаңа аспанның болатынына кәміл сенсек, онда Мәсіхтің мұрасына ортақ болатынымыз туралы оқимыз.

Бірақ адамдар Құдайдың айтқандарына онша қанағаттанбайды. Олардың көбірек білгілері келеді. Егер Құдай бұл тілекті қанағаттандырмаса, онда адамдар айналма жолдар арқылы өздерін болашақта не күтіп тұрғанын білуге тырысып бағады.

Егер адам өмір жолымен қалай дұрыс жүруді білгісі келсе, Құдай Өз сөзін, Өзінің Киелі Рухын берді. Ол арқылы бізге жол сілтейді, жауап береді және бір шешімге келтіреді. Құдай бізге Киелі Рухымен жетекшілік етеді. Бірақ бұл құнды жетекшілікке біз тек Оның баласы болғанда ғана қол жеткіземіз. Елші Пауыл Киелі Рухтың басшылығымен өмір сүретіндердің бәрі де Құдайдың балалары екендігін айтады. Құдайдың балаларының санатында болу Киелі Рухтың жетегімен тығыз байланысты. Біздің белгілі бір шарттарды орындағымыз келмейді, Құдайдың жетегінен бас тартып, өзге жолдарды іздейміз. Адамдар өздерін Құдай қанағаттандырмаған жағдайда сәуегейлерге иек артады, сөйтіп, Құдай айтпағанды осы сәуегейлер арқылы шайтан айтады.

Әр халықта болашақты болжау әр түрлі дамыған. Алдағыны болжау негізінде – құдайлар болашақта не болатынын біледі, сондықтан адамдар сауалды дұрыс қойып, олардың берген белгілерін дұрыс түсіне білсе, онда

бұл сыр адамдар алдында ашылады деген ой жатыр. Бүкіл пұтқа табынушылар дүниесі қара ниетті күштің ықпалында болғандықтан, жын-перінің араласуынсыз, оның ықпалынсыз алдағыны болжап айту мүмкін емес.

Қазіргі және бұрынғы болашақты болжау әдістерін салыстыра келе, біз сол ескі әдістердің қазір де қолданылып жүргеніне көз жеткіземіз. Бұрын сөз және жеке адам арқылы алдағыны болжап айтатын, сонымен қатар түрлі белгілерді түсіндіре отырып айту да қолданылған.

Сәуегейлер өздерін жоғарыдан берілетін ерекше нұрдамыз деп есептейді. Шынында да олар ақыл-ойды шатастыратын және басқа құралдардың көмегімен желігіп немесе ұйқылы –оая қалыпқа келе алатын. Көріпкелдікпен көбінесе әйелдер айналысқан. Бұған әйел жан-дүниесі өте жақсы сәйкеседі.

Біздің заманымызда да көптеген әйелдер осы іспен айналысады. Болашақты болжау туралы естігенде, онымен Құдайдың және Оның Рухының билігінен адамдар айналысатынын байқаймыз. Бұл туралы Елшілердің істері кітабының 16-тарауынан оқимыз. Філіпіліктер жерінде елші Пауыл бойында сәуегейлік рухы бар күтуші әйелді жолықтырды. Өлгі күтуші әйел: “Бұл адамдар – бізге құтқарылу жолын көрсететін Ең жоғары мәртебелі Құдайдың құлдары”, – дегеннен басқа ештеңе айтпаса да, Пауыл оны жын-шайтанның жайлап алғанын сезді. Әйелдің айтқаны таза шындық болғанымен, Пауыл оның басшысы өтіріктің атасы – өзәзіл екенін түсінді. Сондықтан да Пауыл әйелден ол арқылы сөйлеп тұрған жын-шайтанды аластатты. Көп кешікпей шайтан Пауыл мен Силадан кегін қайтарды. Олар қызыл ала қан болғанша соққы жеп, қараңғы қапасқа тасталды. Болашақты болжаудың бір тәсілі – адам ақыл-ойын қара ниетті күшке бергенде, шайтан сол арқылы тікелей әрекетке кіріседі. Ал кеңінен тараған келесі тәсіл, бұл:

Белгілер мен құбылыстарды пайымдау

Жалған құдайдың еркін білу үшін адамдар белгі, нышандарды қолданды. Ошия пайғамбардың кітабындағы 4-тараудың 12-аятында былай деп айтылған: “Менің халқым өз ағашынан сұрайды, ал оның аса таяғы оған жауап береді”. Бұл былай болатын: жерге ағаш аса таяқ тасталады да, оның түсу қалпына орай сәуегейлер өз қорытындыларын жасайды. Бұның өзі карта арқылы болашақты болжау тәрізді немесе күміс теңге тастаумен салыстыру алдағыны айту секілдіге негізделген. Мұны күміс ақша тастаумен салыстыруға да болады. Бет жағы немесе екінші жағына қарап мәселені шешеді.

Тостағанмен бал ашу да осы тектес. Мұны біз тек Мысырдағы Жүсіптің кезінен ғана емес (Жар. бас. 44:5), қазір де кездестіреміз. Кофе қоюына қарап немесе Жаңа жыл алдындағы бал ашуды еске түсіріңіздерші.

Ертеде адамдар өздерінің үйдегі аруақтарынан сұраған. Бұл қалай жүзеге асырылды, ол жағы бізге беймәлім. Қазіргі уақытта да кейбіреулер, тіпті сенушілердің өздері Киелі кітапты бал ашуға пайдалануда. Бұл былай істеледі: Киелі кітапты алып, ойланған сұрақтың жауабы оң немесе сол жақ беттегі аяттың реттік саны болсын деп белгілейді де, Киелі кітапты қарамай ашады. Ойланған аятты оқып, Құдайдың жауабын шешуге тырысады. Бұл күмәнді іс үшін, екінші өсиетте тыйым салынғанына қарамастан, Жыр жинағын да пайдаланады.

Бұдан әрі болашақты болжап айту үшін белгілі құбылыстарды бақылап зерттеп ереже бойынша сәуегейлік жүргізетін. Біріншіден, бұған күннің, айдың тұтылуын бақылау жатады. Күннің күркіреуі мен найзағайдың жарқылдауына (әсіресе ашық аспан аясында) маңыз беріледі. Бұлттың түртүсімен сыртқы көрінісінің де өзіндік мәні бар. Жұлдыз бойынша болжау қазір де кеңінен таралған. Жұлдыздарға қарау жасау арқылы болашақты айтатын адамдардың қатары бүгін

де көп. Жұлдызнаманың көмегімен қай күн бақыт әкелетінін, ал қай күні абай болу керектігін білуге болады. Тіпті, есі дұрыс, білімді деген адамдардың арасында да жұма мен дүйсенбі күндері жауапты жұмысын бастамайтындардың бары адамды таңқалдырады. Бұлардың пікірлерінше, бұл сәтсіз күндер. Ал оларға керісінше бейсенбі мен сейсенбі күндері бастаған жұмыс тез жүретін секілді болып көрінеді.

Аспан мен жер арасында ұшқандықтан, ертеде құстар Құдайдың елшісі деп есептелетін. Алда болатын оқиғаларды адамдар осы құстардың ұшуы және дауыс беруі арқылы болжаған. Құдайға құрбандық берілген кезде шалынған малдың бауыры мен қанының түр-түсі мен пішіні қандай екеніне, оттың түсіне, күлдің қанның түріне дейін назар аударылатын. Күтпеген жерден біреуді жолықтыру немесе түшкіріп қалуда ерекше белгі болып саналады. Наполеон мен Вольтер білімді оқыған адамдар болғанына қарамастан, құстардың дауыстарына зер салғандары белгілі. Бірқатар нышандарды алып қарайық: адамдар жапалақтың дауысынан әлі күнге дейін ажал немесе басқа да бақытсыздық әкеледі деп қорқады. Қай аңшы, немесе жолаушы ең алдымен кәрі әйелді кездестірсе, бүгін сәтсіз күн болады деп қапаланбайды? Егер де мысық жолды кесіп өтсе, оң жақтан қой отары өтсе, немесе табалдырықта сабан жатса жаман ырым деп есептейді. Егер сөйлесіп тұрғанда біреу түшкірсе, әңгіменің шын болғаны. Біз әлі де ырымдар мен белгілерді талқылау кең етек жайған, сайтан тағында отырған жалған тәңірге табынушылар арасында тұрып жатырмыз.

Бұл жерде өте сақ болған абзал, өйткені түс арқылы Құдайдың адамдарға ашылуы мүмкін. Бұл туралы Киелі кітапта бірқатар мысалдар келтірілген. Қараңғы қапаста отырған Жүсіп шарап құюшы мен наубайшының түстерін жориды. Ол жеті семіз және жеті көтерем сиыр, жеті масақ туралы түстерді жориды. Даниел болса, Наушаруан патшаның түсін жорып береді. Құдай түс арқылы пенделеріне өсиет айтқысы немесе ашылғысы келуі мүмкін. Бірақ көп жағдайда мән-мазмұнын білмейтін түстер де болады. Міне, осы сәтте түс жорушылар, сәуегейлер көмек беруге тырысып бағады. Мұнда түс жору

туралы жазылған қомақты немесе шағын кітапшаларды көруге де болады. Шынын айтсақ, осы кітапты оқымаған адамның саны кемде-кем шығар. Мұндай кітаптардың авторлары бүкіл түсті қалтқысыз түсіндіреді.

Бір кездері түс – Құдай еркін анық білдіретін ең сенімді құрал деп есептелінді. Сондықтан адамдар түс көруді армандады. Мәселен, өлген адамдардың зиратына барып түнегенде көрген түстері – ата-бабаларының хабары немесе тілегі деп түсінді. Түс көру үшін небір хош иісті заттар, тағамдар пайдаланылды. Мұндай құралдарға Езекиел 13: 18-де жазылған Киелі Жазбадағы «сиқырлы кітаптары» да жатады.

Осы секілді болашақты болжаудың әдістері туралы көптеген кітаптар жазуға болар еді. Заңдарды қайталау кітабының 18-тарау 9-14-аяттарында сәуегейлер, бал ашушылар, арбаушылар туралы айтылған. Мұндайларға, сондай-ақ бал ашу күндері де айтылған. Жұлдыздардың орналасуын қадағалай отырып, бірқатар күндер сәтті, ал басқалары сәтсіз күндер деп белгіленген. Ежелгі римдіктер күндерді қара – сәтсіз, ақ – сәтті және мағынасыз күндер деп бөлген. Яһудилердің де өздерінің жақсы және жаман күндері болған.

Тіпті қазірдің өзінде кейбіреулер дүйсенбі мен жұманы сәтсіз күндер деп өлердей қорқады. Мәсіх айқыш ағашқа керілген күн болғандықтан шығар, әсіресе жұма – сәтсіз күн болып есептеледі. Ал біздерге, сенушілерге, бұл күн ең бақытты күн емес пе? Өйткені, бұл күні бүкіл адамзатты құтқару жөніндегі ең ұлы іс атқарылды ғой. Мәсіхтің өлімі арқылы біз күнәміздан арылып, мәңгілік өмірге жол алдық емес пе!

«13» саны да сәтсіз сандардың қатарына кіреді. Бұл саннан қорқатындар өте көп. Көшелерде «13» санының орнына көбіне «12а» деп жазылады. Бұл саннан қорқу – Иса Өзінің 12 елшісімен дастархан басында отырғаннан, шыққан жоқ па екен, себебі содан кейін Иса айқышқа шегеленіп, Иуда қылқынып өлді ғой. Мен тағы да қайталап айтамын: Мәсіхтің айқыш ағашы бүкіл әлемнің құтқарылуы болды емес пе?

Иса, ешқашан «13» санынан қорыққан емес. Үш жыл бойы Ол 12 шәкіртімен бірге жүріп, оларды үйретті, әрқашан Ол 13- адам болды. Ал біздердің ырымшылданып 13 санынан безуіміз дұрыс бола қояр ма екен?

Сиқыршылық, көз байлаушылық

Заңдарды қайталау кітабының 18-тарауында сиқыршылар туралы айтылған. Бұлар кімдер және сол арқылы не айтылған?

Сәуегейлік пен сиқыршылықтың бірлігі мынада: екеуінде де Құдайдан теріс айналған адам Оның тыйым салғанына қарамастан, адамдарға түсініксіз жайларды білуге тырысады. Белгілі бір шамада сиқырлық адамдарға жабық аймаққа кіру болып табылады. Осы арқылы болашақты болжап айтатындардың көріп келдігі іс немен аяқталатынын, болашақтың қандай болатынын көбірек білгісі келсе, онда сиқырлық етуші әрекет жасайды. Сиқыршы сол үшін тер төгіп, билікті өз қолына алуға тырысып бағады. Ал мұның өзі Құдай еркіне қайшы келгендіктен және сиқыршының өз мүддесі үшін істелгендіктен бұл – Құдайдан берілген күш бола алмайды. Бұл – қара түнектің, шайтанның күші. Елші Пауылдың Салониқалықтарға жазған 2-хатында (2:9) бұл шайтанның кез-келген күшімен алдамшы ғажайып істер және кереметтер арқылы орындалатыны айтылған.

Шайтанның күштері өзін пайдалануға ризашылықпен рұқсат етеді. О өзін іздегендерге әрдайым қызмет етуге дайын. Жын-шайтандар періштелер секілді қызметші рухтар болып табылады. Құдайдың періштелері тек мәңгілік өмір иелеріне ғана жіберіледі, ал жын-шайтандар өлімге бас тіккендерге қызмет етеді. Елші Пауыл Салониқалықтарға жазған 2-хатында: “кейін құритындардың бәрін күллі жамандықтармен... адастырады...” деп айтылған (2:10).

Сондықтан сиқыршылық құралдары ғана емес, әрекеттің өзі де Құдайдың алдында жексұрын қылық болып табылады, өйткені ол Құдай қаламаған іске жұмсалады. Тіпті жақсы

нәтижеге немесе жамандықты қайтаруға қол жеткеннің өзінде, бәрібір, сиқыршылық қара ниетті күштің ісі болып қала береді. Жақсылыққа жету немесе кездейсоқ бәледен сақтану үшін Құдайдың еркі керек, бұған сенім, дұға арқылы, яғни Құдайдың Сөзі, Құдайдың Өз Аты арқылы жетуге болады.

Кейде дана Құдай адамдарға тағдыр тауқыметін тарттырады. Мәселен, Өзіне жақындату үшін оны сырқатқа шалдықтырады. Бірақ адамдар жапа шегу арқылы құтқарылып бата алудың орнына азаптан құтылудың жолдарын іздестіреді. Құдайға бет бұрмай, шайтанның көмегіне жабысады. Белгілі бір себептермен Құдай бермеген нәрсені сиқыршылық арқылы алуға тырысады.

Адамға өз күнәсі үшін өкініп, Құдайға жалбарынып, өзін Құдайдың қол астына беріп, сеніммен күтуден гөрі, сиқыршылықпен айналысу немесе көз байлаушыларға бару тиімді де жеңіл болып көрінеді. Ал шайтан үшін адамдардың Құдайға мойынсұнбай, Құдайға қараудың орнына, оған келуі нағыз қуаныш, бұдан жын-перілер көп нәрсені ұтады. Шайтан өз қызметін ешқашан тегіннен-тегін көрсетпейді. Көп адамдар сиқыршылар өз дегеніне шайтанды күшпен көндіреді деп ойлайды. Шын мәнінде шайтан өзінен көмек сұрағандарға қуанып, істі тындыруға асығады.

Шайтанның мақсаты – жанды өлтіру болса, сиқыршылықтың мақсаты – адам жанына дақ түсіру, залал келтіру. Мұны “қара күштің сиқырлығы” деп атайды.

Біздің бұдан қорқуымыз керек пе? Құдайға шүкір, жоқ! Егер біз Мәсіхтің қанымен жуылғанымызға нық сенсек тұрсақ, онда ешқандай да күш бізге зиян келтіре алмайды. Егер де біз Бақташысына бағынған қойлардай Оған мойынсұнсақ, онда арманымызға жетеміз. “Менің қойларым Менің дауысымды таниды және Мен оларды білемін, олар Менің соңымнан ереді. Мен оларға мәңгілік өмір беремін, сөйтіп олар мәңгілік өлмейтін болады және оларды Менің қолымнан ешкім тартып ала алмайды” (Жохан 10:27-28). Мәңгілік Құдайдың қолындағы мейірбандылық жартасында, Иса Мәсіхтің Қаны арқылы құтқарылған біздер сиқыршыдан да, шайтанның жын-перілерінен де қорықпауға тиіспіз.

Сиқыршылар жын-періні өзіне тартып алу үшін әр түрлі арбау сөздері мен құралдары: шылым шегу, балықтың, бақаның бауыры, адам сүйегі т.б. қолданады. Шайтан болса, нұрдың періштесі кейпінде көрініп, сиқыршылыққа тәннің бәрін жақсы білетіндіктен, мұны Құдайдың Өзі жібергендей етіп көрсетеді. Сөйтіп, бал ашушыларға, сиқыршыларға, арбаушыларға күні түскендердің өзі шайтанмен шатысқандарын аңдамай қалады. Мұны саналы түрде істейтіндер сирек. Тіпті кейде бал ашушы – сиқыршылардың өздері де жын-перінің күшімен әрекет етіп жатқандарын түсінбей, Құдайға мұндай істермен келуге болмайтынын білсе де, шайтанның қызметін Құдай ісі деп есептейді.

“Қара магияның” міндеті – адамдарға қаскөйлік жасау болғандықтан адамдар одан іргесін аулақ салуға тырысып бағады, бірақ мұны Құдайдың қорғауы және көмегі арқылы емес, шайтанның араласуымен істейді. Ишаяның кітабындағы 3-тараудың 18-20-аяттарында Тәңір жүзік пен мұрын сырғаларын алып қояды делінген. Мұның бәрін сиқыршылар тұмар есебінде пайдаланады. Зергерлер сырғалар мен сақиналарға олардың иесін қара ниетті күштерден сақтайтын түрлі белгілер мен әріптерді салады.

Қазіргі таңда жұлдызнама нұсқауымен тас таңдап алып, әшекей зат ретінде пайдалану арқылы тағдырға әсер етуге болады деп сенеді ғой?!

Балгерлік пен арбаушылық, болжап айтушылықтың бәрі сиқыршылыққа жатады. Адамдар осы арқылы жақсылыққа, денсаулығын жақсартуға және т. б. жетуге тырысады. Бірақ бұған Құдай жолымен, Оған жалбарыну, күнәсін мойнына алып өкіну, мінәжат ету арқылы емес, сиқыршылықпен жетуге тырысады. Бәлекеттен Құдайдың көмегімен емес, шайтанның күші арқылы арылуды қажет етеді. Құдай тыйым салғанның бәрін ол шайтаннан алады. Сиқыршылық кезінде Киелі кітаптағы ұғымдар жиі еске алынатынына мән беруге болмайды, мәселен, Исаның есімі, Иеміз үйреткен “Көктегі Әкеміз...” Дұғамен көлегейленгенімен, мұның бәрі сиқырлау болып табылады. Лютер: «Құдайдың атымен сиқыр жасамай, Одан қорқып, Оны қастерлеуіміз керек», – деп дұрыс айтқан.

Тіпті Құдайдың сөздерін айтса да, шайтанның аты шайтан. Ол мұнысын Мәсіхті шөл далада сынауы арқылы дәлелдеп берді. Філіптегі әйел Құдайдан қорқатын сөздерді айтқанымен, ол арқылы қара күштің әрекет жасағаны белгілі.

Сиқыршылық пен арбаушылықтың күшімен сауыққандардың барлығы да Құдайға бет бұрғаннан кейін тағы да ауыратын болды. Арбау кезінде қара күштің әрекет ететінін осыдан-ақ білуге болады.

Ерте замандағы сиқырлау, дуалау туралы көп айтуға болады. Бұл жөнінде Киелі кітапта көптеген мысалдар келтірілген. Сиқыршылық Мысырда, Бабылда, Грекияда кең өріс алған. Тірі Құдайдың барын және сиқыршылықтың мәнін білсе де, бұл Исраил халқының арасында да кеңінен тарады. Піліп Мәсіхті уағыздап жүрген кезінде халықты таңқалдыра сиқыршы Шимонмен жолығады (Ел. іс. 8:9). Елші Пауыл Патта Барешуа есімді жалған пайғамбарды кездестіреді (Ел. іс. 13:6). Пауыл ғалаттықтарға арнаған хатында (5:20) сиқыршылықты тән ісіне жатқызып: “Мұндаймен айналысқандарға Құдай Патшалығында орын жоқ”, – дейді. Жоханның Аянындағы 21-тарауда «сиқыршылар мен жалған тәңірге құлшылық етушілердің үлесі күкірт жанып тұрған отты көл болмақ...» және көктегі Иерусалимге кіре алмайды делінген (Аян 21:15).

Құдай Сөзінде салмақты ескерту болғанына қарамастан, Мәсіх жолын қуушылар арасында да сиқыршылықты кездестіруге болады. Бұл мәселе төңірегінде бағушылардың көптеген күәліктері бар. Мәселен, Жохан Златоустың былай дегені бар: “Сен бойтұмарды ғана емес, арбауды да пайдаланасың, балгер кемпірлерге баруға ұялмай, оларды үйіңе ертіп келесің. Бұл кемпірлер Мәсіх жолын қуушылар және Құдай атынан сөйлейді деуің сылтау бола алмайды. Өздерін Мәсіх жолын қуушылармыз деп атап, Құдай алдында жексұрын қылық істеп, Құдай атын қорлағаны үшін мен оларды жек көремін”. Оның бойтұмарға және басқа да қорғаныс құралдарына қарсы айтқан пікірлеріне ешкім құлақ аспады. Бойтұмарлар күні бүгінге дейін пайдаланылуда. Соғыс кезінде солдаттар жау оғы мен найзасы дарымайды деген ниетпен түрлі “аспан

хаттары” мен бойтұмарларды тағып жүргені белгілі. Көпшілігі қара ниетті рухтан қорғану мақсатымен түрлі бойтұмарлар, сырғалар тағып, сақиналар салады, ал бірақ осы арқылы шайтанның билігінде екендерінен бейхабар.

Құдайдың Өзі осындай күнәға белшесінен батқан адамдарға тіпті мәсіхшілерге де бәрін ұқтырар деп шын жүректен тілек айту ғана қалады.

Аруақтарды шақыру

Заңдарды қайталау кітабының 18-тарауының 10-12-аяттарында күнәлар тізімінде “аруақтарды шақырушы” еске алынады. Бұл енді сиқырдың басқа бір саласы. Аруақтарды шақырушы адам түрлі белгілер, түтету және басқа да рәсімдердің көмегімен ауруларды сауықтырып, жын-шайтанды қуу үшін түрлі ғажайып істер жасайды. Олар көбіне әбжыланды арбаумен айналысатын, бұл өнер қазір де сақталған. Өлген адамдардың аруағын шақыру арқылы болашақты болжауда көпқолданылатын. Саулдың елден бүкіл бал ашушылар мен сиқыршыларды қуып, кейіннен өзі солардан көмек сұрағаны белгілі (1Патш. 28:3-10). Манассия оларға қайтадан жүгінді (4Патш. 21:6, 2Шеж. 33:6). Жосия патша сиқыршыларды қуып, пұттар мен жансыз тұлғаларды қиратып, жексұрын қылықтарды жойғанымен (4Патш. 23-24), шайтан оларды қайтадан енгізді.

Мәсіхтің тұсында ел аралап, сиқырлықты табыс көзіне айналдырып, мұнымен құпия айналысқандар көп болды. Олар өздерінің сиқыршылық өнерінің ұстазы Сүлеймен екенін, олар сиқыршылықты соның кітаптарынан үйренгендіктерін айтуды ұнататын. Ал шын мәнінде, бұл арада Сүлейменнің кінәсі – Мұсаның 6,7-кітаптары деп аталатын кітаптарға Мұсаның қатысындай ғана. Бұл кітаптардың Мұсаға ешқандай қатысы жоқ. Мұнда адамдар мен малдардың түрлі ауруларына қарсы қолданылатын дуалау сөздерінің сиқырлы рецептері жинақталған, ал бұларда Құдайдың, Мәриям Қыздың есімдері, сондай-ақ жын-перілердің рухы араласып аталады. Бұл кітаптардың бірінші бөлімі “Қара қарға”, ал соңғысы

– “Отты аждаһа немесе «Аспан мен тозақ рухтарын билеу» деп аталады.

Өлген адамның аруағынан сұраушылар туралы тағы айтайын дегенім: әдетте олар аруақтарды сол адамның бейітінің басында шақырған. Киелі кітапта былай делінген: “Жалған тәңірлерге арналған бақтарда құрбандық шалып кірпіш үстелдердің үстінде хош иісті заттарды да түтетеді. Олар қабыр бастарында отырып, құпия жерлерде түнеп, аруақтарға сиынады» (Ишая 65:3-4). Аруақ шақыратындардың тілдері майда, дауыстары жер астынан шыққандай сыбырлай, мыңқылдай естіледі, сондықтан көпшілік бұларды алдамшы, олар әділетсіз, өлгендердің аруақтарымен сөйлестік деп елдің басын қатырады деп ойлайды. Өлгендердің аруақтарын шақырып, оларға сұрақтар қою – құр өтірік емес, мұны жасауға болатынын айтқым келеді. Егер өлгендердің аруақтарынан сұрау мүмкін болмаса, онда Құдай бұған тыйым салмаған болар еді.

Көпшілік адамдар мұны әлі күнге дейін алдау деп есептейді. Әрине, алдап-арбауы да мүмкін. Мұны көптеген сот процестері дәлелдеп те отыр. Мәселен, көпке белгілі Анна Рот сиқыршы емес, өтірікші болып шықты. Алайда бұдан спиритизмге (зұлым рух шақыруға) жататынның бәрі бос сөз деген ұғым тумауы керек. Демек, рух әлемімен тікелей байланыс бар.

Киелі кітапта спиритиземнің сеансы туралы жазылған. Абыржыған Саул патша алдағы шайқастың қалай аяқталатынын білмек болды. Бұл жайлы ол Тәңірден сұрап еді, Тәңір оның түсінде де аян бермей қойды, пайғамбарлар арқылы да жауап қатпады. Содан кейін Саул Айн-Дордағы сиқыршы әйелге барып, Самуилдің рухын шақыртады. Жерден Самуил шығып, оның ертең-ақ өлгендер патшалығында болатынын айтады.

“Самуилдың аруағы көрінді ме, әлде жоқ па?” – деген сұрақ төңірегінде әрқилы пікірлер айтылуда. Мәселен, басқа да бағушылар Лютер тәрізді Самуилдың аруағының көрінуі шайтан арқылы болған алдамшы іс, елес қана деп есептейді. Лютер өз пікірін “Құдай Самуилдың аруағын сиқыршы әйелге

қозғауға жол бермейді”, – дегенге негіздейді.

Басқалары, соның ішінде, ең алдымен Сирияда 457 жылы қайтыс болған Теодорет фон Кирус өлген пайғамбар Самуилдың келуі рас, бірақ бұл сиқыршылықтың еркімен емес, құдіретті Құдайдың әмірімен болды дегенді қуаттайды. “Әйел Самуилды көргенде қатты айқайлап жіберді”, – деген сөзден сиқыршы әйелдің таңқалып, абыржығаны аңғарылады. Сірә, ол Самуилдың келетінін өзі де күтпесе керек. Мүмкін, өзгелерге бірдеңені бықсытып, келушіні алдағысы келген де шығар, алайда Құдай Саулдың дұрыс жауап алуын қалағанға ұқсайды. Бұл оқиға белгісіздіктің құпиясымен бүркелген.

Шын мәнісінде не болды: Самуилдың аруағы ма немесе шайтанның елесі ме? Бұл сауал әлі де талдануда. Көптеген спиритистер (аруақтарға сенушілер) Пауылдың, Лютердің және т. б. аруақтармен сөйлескендеріне сенетіндерін айтады. Осы аты аталған адамдардың аруақтары ауызбен айтуға келмейтін дәрекі сөздер айтқандары құлаққа ерсі естіледі. Мәселен елші Пауылды бір ғана нәрсе еріксіз өзіне тартқан еді – барлығынан азат болып, тек Мәсіхпен бірге болу. Құдай балалары мұрасының болғанына ұлылығын дәріптей білді! Сонымен бөлісіп оның рухы ғажайып, биік сөздерді айтпас па? Ал спириттер “Пауыл елшінің аруағын” шақырғанда, оның аруағы ешқандай мағыналы сөздерді айтпай, қайдағы бір дәрекі де жаман сөздерді айтады.

Тауда Иса Мәсіхке келген Мұса мен Илияс Оның өлетіні, мәңгілікке кететіні жайлы айтты. Олар Айқыштың үлкен мағынасын айтты. Ал спиритистер шақырған рухтар ақымақ жайттарды, болмаған оқиғаларды әңгімелейді.

Сондықтан үлкен сұрақ туындайды: шын мәнінде сол адамдардың рухтары туралы сөз болып тұр ма? Жоқ, өздерін адамдардың шақырылған рухтар етіп көрсететін жындар әрекетінің көрінісі немесе құбылысы туралы сөз болып жатыр.

Спиритизмнің арқасында көптеген адамдар о дүниедегі өмір туралы сенімге ие болды ма – бұл да маңызды сұрақ. Алайда адамның өлгенінен кейін де өмірдің тоқтамайтынын спиритизмнен іздеуінің қажеті жоқ. Бұл туралы біз Киелі

Жазба арқылы жақсы тұжырымға келе аламыз. Әрине, рухты ояту үшін Құдайдың түрлі әдістерді қолдануы да ғажап емес. Мүмкін, кейде шындықты шынайы іздеушімен Құдай спирттер сеансы арқылы да сөйлесе алатын шығар. Дегенмен, біздер Құдай Сөзінде айтылғаннан таймауымыз, соны басшылыққа алуымыз керек. Онда былай делінген: “Сенің Құдайың, Тәңір әкелеріңе беруге Өзі ант еткен жерге сені апарғанда, сендердің араларыңда аруақтарды шақыру деген болмауы тиісті, өйткені мұны істеген әркім Тәңір алдында жексұрын”.

Яғни, тек бұл іс қана оңбаған қылық емес, сонымен қатар оны жасаған адам да Құдай алдында жексұрын атанады. Осы сөздерді жазып көп адамдар келетін спирттер сеанстары мен мәжілістері өткізілетін үйлердің қабырғалары мен есіктеріне іліп қойса дұрыс болар еді.

Киелі кітапта былай деп жазылған: “Егер еркектер мен әйелдер өлгендердің аруағын шақырса немесе көзбояушылықпен айналысса, онда олар өлім жазасына кесіледі; олар таспен ұрылсын, олардың қаны өздерінің мойнындарында” (Леуіліктер 20:27).

Осы тыйым салынған істермен айналысушылар, түгел тыңдаңдар! Бал ашушылар, сиқыршылар, карта ашушылар мен сәуегейлер, сендер де құлақ салыңдар: «таспен ұрылуға және өлуге тиісті».

Құдайдың қаһары одан да басым. Ол тек бал ашушыларды, дуалаушыларды немесе сәуегейлерді ғана емес, сонымен қатар осылармен байланыс жасағандарды, оларды бал ашушыға және емдеуге мәжбүр еткендерді сотқа тартады.

Киелі кітапта Құдай былай дейді: “Аруақты шақыратындарға да, бақсы-балгерлер мен сиқыршыларға ешбір бармаңдар! Өйткені сендер олармен арамданасыңдар. Сендердің Құдай Иелерің Менмін” (Леуіліктер 19:31). Демек, кімде-кім бал ашушыларға немесе сиқыршыларға барса, онда олардың Құдайдан іргесін аулақ салып, қара ниетті күштен жәрдем сұрағаны. Құдай Леуіліктер 20:6-да бұдан да қатты айтады: “Балгерлер мен аруақ шақырушыларға жүгінетіндерге де Мен қарсы боламын, және халықтың арасынан аластатамын”.

Қымбатты жан, құлақ сал. Егер сен осы істермен айналысқың келсе, онда мынаны біліп қой: Құдай сенен Өз жүзін теріс бұрады. Мұның не екенін сен білесің бе, бұл – Құдай саған қамқорлық жасауды қояды, бұдан әрі саған деген игілік пен мейірбандықты доғарады, батасын бермейді, жақсылық жасамайды деген сөз. Ол сенің дұшпаның ретінде теріс қарайды және сені халқыңнан аластайды!

Енді бұл істі зиянсыз деп кім айта алар екен? Бұл әбден сыналған Киелікітаптық емдік құрал деп айтуға бола ма? Бал ашушылық пен арбаушылықты сиқыршылықтың күнәсі деп Киелі кітап ескертсе де, бұл тым әсірелеп жібергендік деп айтуға бола ма? Жоқ, осындай жолмен адамдарды сауықтыруға тырысушылық Киелі кітаптан алынбаған. Бұл халық емі емес, ол – күнә, сиқыршылық Құдай алдында жексұрын қылық болып табылады. Егер сен шын жүрегіңмен тәубеге келмесең, онда ажал аранына түсетінің хақ.

Иә Құдай, “Осыны жасаушы әркім Тәңір алдында жексұрын” деген сөзді әр оқырманның жүрегіне ұялата гөр.

Оккультизмнің кейбір түрлері

Құдай Сөзін оқи отырып, қара ниетті күштер дүниесінің қаншалықты қорқынышты екеніне және осы бір күнәнің кеңінен тарап отырғанына біздің көзіміз жетті. Ал егер бүгінгі әлемге көз жіберсек, бұл күнәнің қазір де кең тарағаны үрей тудырады.

Сүйелді дуалау

Дуалаушылар көбінесе сүйелден арылтуға жиі қолданылады. Жеріміздің түкпір-түкпірінде мұның қалай жасалатыны туралы бірнеше мысал келтірейін. Гамбургтен келген хатта бір әйел былай деп жазды: “Менің оң қолымда көптеген сүйел бар еді. Біздің бұрынғы үй шаруасындағы әйел, егер бір күндері өлген адамның денесін жууға өзінің қолы жетсе, онда менің сүйелдерімді тазарта алатынын

айтты. Шынында да, соның айтқаны бойынша ем жасап едім, сүйелден тазардым”. Дармштадтан алынған бір хатта былай делінген: “Мектепте оқып жүрген 12 жастағы кезімде сол қолыма өте көп сүйел шыққан еді. Біз оларды кетіреміз деп қаншама әрекеттенгенімізден ештеңе шықпады. Содан кейін біреулер маған бір қартаң әйелге баруға кеңес берді. Ол әйел жіп алып, ілмешек етіп түйді де беймәлім сөздерді күбірлеп, әлгі ілмешек жіппен сүйелдің әрқайсысын буды. Содан соң ол бұл жіпті біреуді жерлегенде соның моласына тастайтынын, сөйтіп, сүйелдердің із-түзсіз жоғалатынын айтты. Солай болды да. Барлық сүйелдер із-түзсіз жоғалды”.

Весталяядан келген хат мынадай сыр шертеді: “Он екі жастағы баланың екі қолына да сүйел көп шыққан екен. Жуырда ол маған келді, қолына қарасам, тап-таза. Сүйелдерінен қалай құтылғаны туралы сұрағанымда, бала мынаны айтты: “Көршіміздің қызы қара жіп алып, қолыңда қанша сүйел болса, сонша ілмек жасап бу, содан соң әлгі жіпті үйдің шатырынан су ағатын жерге апарып көм деп ақыл айтты. Соны жасап едім, сүйелден тазардым”.

Балалар үйінің тәрбиешісі жазған хатты оқи отырып, дуа етудің не екенін түсінетіндердің аз екенін айтуға болады. Хатты оқиық: “14 жасар ұлымның екі қолына да сүйел қаптап кеткен болатын. Оларды кетіру үшін істемеген емім қалмады. Бірде біздің бағушының шешесі балаға сүйелден құтылудың жолын жасырын үйреткен көрінеді. Жаңа ай туғанда қолын сүртіп: “Мен нені көрсем, сол өссін, нені сүртсем, сол жойылысын. Өке мен Ұл және Киелі Рух”, деп айту керек екен. Бірақ бұл туралы ешкімге тісінен шығармауды тапсырған көрінеді. Баланың қолындағы сүйелдердің жоқтығын байқап қалмасам, мен бұл туралы білмес те едім. Баладан не істегенін сұрап едім, ол еш нәрсені мойнына алмады. Тек арада біраз уақыт өткеннен кейін ғана ол мойындады”.

Оберлаузитцтен келген хатта былай деп жазылған: “Әжемнің мені неше рет түшкіргенін бір Құдайдың Өзі біледі, сенуші бола тұра оның неше түрлі рецептері мұндай көп болар ма? Құдайдың оны, оның жанын да, тәнін де неге мұншама көп қиналтқанын ол өзі сезінбеді. (Сиқыршылық күнәсі үшін ол

өмірде ешқандай опа көрмеді деп айтуға болады). Егер жаңа ай туғанда бір нәрсе айтса немесе істесе, онда содан кейін қолдағы сүйел кетеді дегенге кәміл сенген кездерімде солай болды да. Әдетте ол бәрін жаңа ай туғанда жасайды. Бірақ енді айдың ықпалынан босай алсам, барлық сүйелдерім мен ауруларымның қайта оралуына келіскен болар едім. Жаңа ай туса болды, менің қуанышым да, жақсы көңіл-күйім де су сепкендей басылады, жын-перілер мені қинайды”.

Бір әйел былай деп жазды: “Өз Құтқарушымды тапқаным, міне, екі жылдан асты, бірақ сенімде өсуім жеткіліксіз. Мұның бәрі сиқыршылықтың күнәсінің кесірінен шығар деп ойлаймын. Қыз кезімде сүйелден арылу үшін дуалаушыға барған едім, қарта да аштырған болатынмын...”

Тағы бір әйелдің мынандай хат жазғаны бар: “Менің өзім де сиқыршылықпен айналыстым, басқаларды да болашағым туралы сәуегейлік айтуға мәжбүр еткенім бар. Бұл үшін тұрақты түрде Киелі Үштіктің атымен шоқыну пайдаланылды. Менің қолымда сүйел көп болатын. Оны кетіру үшін “Көктегі Әкеміз біздің” дұғасын оқыдым. Қанша сүйел болса, сонша ілмек будым. Дұғаны оқып, жіпті табалдырық астына көмдім. Бір қыздың қолына да сүйел қаптап шыққан екен. Оған ұзын жіп алып, көп ілмек жасап, кісі жерлеу шеруі көрінісімен, көшеге осы жіпті кер, сонда шеру жіпті басып өтеді де, сүйелің кетеді деп ақыл айтқанға ұқсайды. Ол осылай істеп, сүйелден арылды”.

Осы куәландырулардан кейін қандай қорытынды шығаруға болады? Біріншіден, бұл күнәнің қаншалықты көп тарағаны айқын. Екіншіден, жұмыр жердің қай түкпірінде болса да мұны жасай алады. Үшіншіден, мұнымен айналысатын адамды байдың да, кедейдің де арасынан кездестіруге болады. Әрқашан да “Көктегі Әкеміз” дұғасы немесе Киелі Үшбірліктің аты пайдаланылады. Осыған орай дуалаушылардың да, бал ашушыларға барушылардың да: “Мұнда тұрған еш сәкеттік жоқ, біз Құдайдың атын айтамыз ғой”, деп шімірікпей мәлімдейтіндерін қайтерсің. Дегенмен, қалай болғанда да, бұл дұға емес. Мұндай жағдайда “Көктегі Әкеміз” деген қасиетті дұға өз орнында оқылып

тұрған жоқ, ол арбаудың тәсілі болып тұр. Құдай атынан айтылғанымен, астарында сиқыршылықтың күнәсі жасырынып жатыр. Мұнда ешқандай ізгіліктің де, құдайшылықтың да жоқ екендігін, тек соның көмегімен сырқатты айықтыруға тырысқан сиқыршылардың ақылға көнбейтін іс-әрекеттерін көруге болады. Қолдағы сүйелдің санына қарай ілмек жасап, содан соң жерлеу шеруі өтетін көшеге керу немесе молаға тастау, болмаса жерге көму, мұндай істер Құдай ісі бола ала ма? Ешқашан да! Оған қоса сиқыршыға барғандардың бәрі бұл жайлы үндемеуі шарт. Барлығы да ай жаңа туған кезде істеледі екен. Мұның бәрі Құдайға емес, қара ниетті күшке сенушілікті айқын көрсетеді. Егер белгісіз сөздерді айтып, осы әдістерді қолданғанда, сүйел жойылса – бір күштің барын дәлелдейтіні сөзсіз. Егер мұның бәрі ақымақтың ісі десек, онда ешқандай әрекет те болмас еді. Бірақ қол сүйелден түп-түгел тазарады, демек, қимыл, әрекеттің болғаны. Мұнда жын-перінің күшінің араласқаны, мұндай сырқаттарды сауықтыруға қара ниетті күштің әсері болғаны айқын. Әрине, адамдардың көпшілігі мұны біле де бермейді, оны түсіне де қоймайды. Алайда осының бәрін біле отырып, саналы түрде өздерін күнәға батыратындар да бар.

Мен отбасымда: «Шайтанда шынымен ауруды сауықтыра алатын күш бар, бірақ сол іспен айналысқан және өзін дуалатқан адам қасіретке қалады», – деп айттым. Маған бәрі күлді. Үйге қонаққа келген үлкен ағам басына теміреткі түскен баласын тәуіпке апарғаны туралы айтқан еді. Сонда шешемнің: “Шайтаннан болсын, Құдайдан болсын, әйтеуір жазылса болғаны!” – деп айтқаны бар. Осыны естігенде менің айқайлап жібергім келді. Бұл әңгіме Бранденбургте болған еді. “Шайтаннан болсын, Құдайдан болсын, әйтеуір жазылса болғаны!” – деген сөз есіме түссе, қорыққанымнан жүрегім атша тулайды.

Көптеген адамдар осы пікірге қосылады. Құны қанша тұрса да, көмектессе болғаны деседі. Осы арқылы Құдайды ренжіте ме, немесе өз арына ауыр күнә жүгін арта ма бәрібір – онымен еш жұмыстары жоқ. Оған мән бермейді.

Тіс ауруын және басқа ауруларды дуалап оқыту

Сүйелді қалай кетірсе, тіс ауруы мен теріскеннен де солай құтылады. Бір кішкене қыздың тісі ауырғанда, оған жаңа ай туған күні бұл ауруды айға беретініне уәде еуу керектігін айтқан еді. Ол осылай істеді, содан бері оның тісі әлі бір де бір рет ауырған жоқ.

Шпандаудан бір жас жігіт былай деп жазды: “Бала кезімде көзіме жиі теріскен шығатын еді. Қазір қайтыс болған әжем дуалап оны емдеуге тырысатын. Кейінгі кезде оны емдеуді өзім де үйреніп алдым”.

Басқа бір хатта былай деп жазады: “Менің он бес айлық қызыма рахитпен ауыру қауыпі төнді. Маған жұрт көп адамдарға көмегі тиген бір сиқыршыға баруға кеңес берді. Емді айдың аяғындағы жұмада, ең жақсысы Ұлы жұмада жасау керек екен. Сәбиімнің шашы мен тырнағын кесіп, бір шүберекке орап, шоқындырды да, әлгі түйінді бір жерге қойды. Содан соң мен түсінбейтін сөздерді күбірлеп айтып жатты, тек Құдайдың атын атағанын аңғарып қалдым. Өзімнің төрт жасар ұлым тілме болып ауырғанда да мен оны емшіге апаруға мәжбүр болдым. Ол ай толысқан күні ауырған жерді қолымен сипап қана жазды”. Нәтижесі қандай болды? Оны біз хаттың жалғасынан білеміз: “Ұлымды жын-шайтанның айналдырғаны соншалық, түнде оны жалғыз қалдыруға қорқатын болдық. Байғұс бала жиі жынданып, соның салдарынан әбден азап тартты. Ол қорқыныштан жиі қалш-қалш етіп, адамдардан көмек сұрап айқайлайтын болды. Оған ажал тап беріп, өлтіріп тастағысы келетіндей көрінді. Балам қиналған кезде, оған қарау аянышты еді!

Сиқыршылықтың зардабы туралы одан әрі айтайық. Осы жағдайлардың бәрінде де адам баласы қайтсе де денінің сау болуы үшін жанталасады. Бұл Құдай еркіне үйлесімді ме, ол жағына мән берместен адамзат өз ауыртпалығынан – ауруынан айығуды ойлайды. Егер Құдай адамның ойындағысын істей қоймаса, онда адам саналы түрде ме, әлде жоқ па, әйтеуір, шайтаннан көмек сұрайды.

Адамдар өз тәніне жиі мән береді, асыра бағалайды.

Құдай бірінші кезекте жанға қамқорлық жасайды. Оның ұғымында жан тәннен анағұрлым маңызды, сондықтан оған қамқорлық жасау – өмірдің өзінен де артығырақ болуға тиісті. Шайтан өз кезегінде адамдардың тәні мен денсаулығын маңызды деп санатқызады да, адам өз тәні үшін жаны мен мәңгілік шаттықты садақа етуге барады. Бұл барып тұрған ақылсыздық және жөнсіздік.

Барлық жағдайларда, Құдай Өзін сүйетіндердің игілігі үшін әрекет етеді (Рим. 8:28) деп жазылды емес пе? Бірақ бұл туралы ештеңені білгілері де келмейді. Ешкім де өз ауруына шыдамдылықпен төзгісі келмейді. Сондықтан одан қайткенде де тез емделудің амалын қарастырады. Иә, аурудың беті қайтады. Ал содан кейін күнә ауыртпалығын тарту қандай ауыр десеңші.

Дуалаушылардың үлкен табысқа жетіп отырғанына ешкім шек келтіре алмайды. Бір әйел Рур облысынан былай деп жазады: “Сиқырлық арқылы маскүнемдіктен арылуға болатынын естігендеріңіз бар ма? Ал мен осының куәсі болдым. Маған күйеуі ызақор сенуші әйелдің мекен-жайын айтты. Мен барғанда әйел үйінде жоқ екен. Күйеуі қорқынышты көрінді. Онысына қарамастан мен орындыққа жайғасып, үй иесін сөзге тартып, құтқарылу туралы айта бастадым. Ол болса, үн-түнсіз тыңдады. Әйел жуық арада келмегендіктен, оның маған жолығуы керек екенін айтып, күйеуіне тапсырдым. Ал әйел маған келгенде, ол да күйеуі тәрізді үрейлі адам болып көрінді. Мен одан күйеуі туралы сұрағанымда, ол бұрын қатты ішуші еді, ал қазір бір жұтым арақты аузына алмайды дегенді айтты. Мен бір нәрсені аңғарғандай болдым, бірақ ол ойымның дұрыстығына күмәнданып: “Немене, ол Көк айқыш қоғамының мүшесі ме?” – деп сұрадым. Әйел: “Жоқ”, – деп жауап берді. Содан кейін әйел оқиғаның қалай болғанын айтты. Оған адамдарды маскүнемдіктен айықтыратын бір кемпірге жолығуға кеңес беріпті. Әйел соған барады. Ақша төлегеннен кейін кейін, кемпір көрші бөлмеге кіріп кетеді. Қайта оралған ол: «енді үйіңе бара бер, күйеуің ішімдік дегенді аузына алмайтын болады» – дейді. Үйіне келсе, күйеуі төсек тартып жатыр екен. Қайта-қайта құсып, бір сөзбен

айтқанда, албастының өзімен алысып жатыр екен. Ол: «шайтанды көріп тұрсың ба? Жоқ ол мені ала алмайды!» – дейді. Бірнеше айдан кейін күйеуі бір стақан сыра ішеді. Бұдан соң тағы да баяғы ауруы қайталайды. Содан бері күйеуі ішімдік ішуді қойыпты. Әрине, әйел мұның оңбағандық екенін және енді екеуінің де шайтанның шырмауында екенін айтты. Бірақ ол оған селт ете қойған жоқ. Керісінше, маскүнем күйеуінен тыныштық алғанына қуанған сыңай танытты. Қандай сұмдық алданыш десеңізші!» Иә, сиқыршыға барсаң көмектеседі, бірақ бұл Құдай күші емес, шайтан өктемдігімен болған іс. Құдай маскүнемді Өз атынан Киелі Рухтың күшімен жазады, ал шайтан болса, бұл құрбандықты да өз қоластында ұстау үшін, сиқыр күшімен сауықтырады. Шайтанның қулығы-ай десеңші! Шіркін, алданған аңқау адамдар-ай!

Құтқарылу мейрамының суы

“Құтқарылу мейрамының суы” сиқыршылық істе үлкен маңыз атқарады.

Гессендегі бір елді-мекеннен біреу былай деп жазады: “Бізде Құтқарылу мейрамы күні, күн шығар алдында ағып жатқан өзеннен су алу дәстүрі бар. Су үйге әкелінгенше сөйлесуге еш болмайды. Осындай ағын суды қыш ыдысқа құйып, жертөледе жыл бойы сақтайды. Бұл суда емдік қасиет бар деп есептейді”.

Тюрингиядан келген хатта былай делінген: “Мәсіх айқыш ағашта азаппен өлген жұмаға қараған түнде және Құтқарылу мейрамының алғашқы күні, күн шығар алдында су әкелінеді. Бұл су бұзылмайды және емдік қасиеті бар. Оны түрлі ауруларға қарсы пайдаланады...” Осы хатта көптеген адамдардың өз үйлерінде өрт шықпауы үшін, сиқыршылардан үйді үшкіріп беруі туралы сұрағаны айтылған. Бөренелердің үстіне немесе астына арнаулы жазуы бар қағазды салса, үйге еш қауіп төнбейтін көрінеді. Мал аман болуы үшін қора-қопсыға да осыларды жасайды екен.

Жақында бізде діни жиындарға жиі қатысып жүретін бір әйел қайтыс болды. Ол егде тартқан, қартайған адам

болатын. Ол ауырып қалғанда, өзін “сепкен” көрінеді. Бұл үшін гүл өсіретін қыш құмыраға толтырып күл салады, соған тұқым егеді. Ал осы ырымды істеген кезде не деп айту керектігі маған белгісіз. Егер тұқым өніп шықса, онда ауру құлан таза жазылады. Ал егер шықпаса, онда өлуге тиісті. Оған әлдекімдер мұның күнә екенін айтқанда, ол: “Бірақ бұл маған ылғи да көмектесіп келген еді”, - деп жауап береді. Ол қиналып өлді. Соңғы сағатында ол тағы да сиқырлық туралы айтып, өкінетінін білдірді. Күнәсі жөнінде қанша тәубе еткенімен, ақтық деміне дейін шайтанмен алысып жатқаны мен үшін өте қорқынышты болды. Одан қандай болса да “отты хат” жоқ па деп сұрағанда, оның бәрін жағып жібергенін айтты. Көз жұмғаннан соң дүние-мүліктерін қарағанда, олардың арасынан сиқыршылар қолданатын құрал, “өртке қарсы хатты” сақтап қалғаны белгілі болды. Оның өлім алдындағы жан қиналысы да осыдан екен.

Бізде балаларды дұғалаушыға апару кең етек алған. Олар болса, алақанымен сипап, зәйтүн майын жағып, сылап, содан соң сәбилерді қолтығынан алып, әке, Ұл және Киелі Рух атынан айқыш ағаштан асыра лақтырады. Егер баланың ішек құрты болса, онда оны кемпірге апарды. Ол бір үзім нанды алып, ауырған жерді айналдыра жүргізіп өтеді де, оны қара тауыққа жеуге береді немесе жерге көмеді.

Жақында бір адам ауырған еді, оған терезе алдына үш алма қоюға кеңес береді. Алмалар күн шуағынан құрап кеткенде, сырқаты да кеуіп, жазылады. Ай жаңадан туғанда картоп салуға немесе жерге тұқым егуге болмайды”. Осы хаттың соңында адамдардың көбісі мұны күнә екен деп ойламайтыны жөнінде де айтылған екен.

Ең қауіптісі, адамдар осы “ізгі ақыл” арқылы шайтанның шырмауына түсіп қалатындарын ойламайды да. Бір егде тартқан сенуші бауырласпен болған оқиға маған мәлім. Ол әңгіме үстінде былай деген еді: “Егер сен біреуді аяп, қалай болған күнде де оған көмектессең, бұл күнә болмайды. Ал еңбегіме деп ақша алсаң, күнәні арқалағаның”. Бұл тұжырымға қарағанда, тегін атқарылса, сиқырлыққа Тәңір түк демейтін көрінеді. Бұдан, біз өзгені қойғанда, тіпті осы қарт

уағыздаушының өзі сиқыршылықтың сырын түсіне алмай отырғанын аңғарамыз.

Егде тартқан бір адам өз әйелі туралы былай деп жазыпты: “Әйелім қыз күнінде басы ауыра берген соң, бір “діндар” дуалаушыға қаралған екен. Бұл сиқыршы оның басына орамал салып, үш түйін жасап, Құдайға тіл тигізетін сиқырлық дұғасының түрін оқыса керек”. Адамдардың осындай жексұрын жолға Құдай атын жамылуы қандай сұмдық. Ал бас ауруынан айығамын деп, шайтанмен шатасып, өмір бойына соның жетегінде жүру қандай сұмдық өкініш десеңші.

Кезінде көз байлаушы болған бір әйел былай деп жазды: “Мен сиқырмен талай адамның көз ауруын жаздым. Бұл көбінесе таңсәріде немесе күн батар сәтте, ағаш түбінде, болмаса ай туғанда атқарылады. Белгілі сөздерді айтып, саусақпен көзді айналдыра сипау керек, содан соң үш рет шоқынып, әке, Ұл және Киелі Рух атын атау қажет...”

Мен шамамен осы мазмұндас басқа да көптеген хаттар алдым. Оның әрқайсысының мазмұнын айтып шығу мүмкін емес. Түсінікті және дәлелді болуы үшін мен кейбіреулерінен үзінді келтірейін.

“Тіс ауруын емдету үшін, мен дуалаушыға бардым. Ол үшін мен жағыма бір жапырақ қағазды байлап, оны үш күнге дейін алмай және не жазылғанын оқымауым керек болды. Үш күннен кейін, күн батқан сәтте, мен ол қағазды алып, оны жауырынымнан асыра отқа немесе ағып жатқан суға лақтыруға тиіс болдым”.

Аспан хаттары және отты хаттар

Кезінде мен “Аспан Патшалығының жеті кілті” кітабынан алынған (бұл кітап сиқыршылар арасында белгілі), отты сөздер жазылған, түрлі аспан хаттарын көкірегіме салып жүрдім, өзгелердің де осылай жасауларына кеңес бердім. Бірде “аспан хатын” сырқат балаға салып көріп едім, ол бала одан кейін өліп қалды”.

Шын мәнінде жоғарыда айтылған “Аспан Патшалығының жеті кілті” (немесе жебесі) кітабы, оны бойтұмар етіп үнемі тағып жүргендерге және осы

“Аспан Патшалығының жеті кілті” оған сенушілердің өмір сүруіне немесе өлуіне көмектеседі деп ойлайтындарға аспан есігін мәңгі жабатын кілт болып табылады.

Мұсаның 6,7-кітаптары

“Аспанның жеті кілті” секілді қара ниетті кітаптар қатарына, басында айтып кеткен “Мұсаның 6,7-кітабы” деген кітап та жатады. Бұл кітаптың Мұсамен ешқандай қатысы жоқ. Ол қас-жаулардың ойлап тапқан қулықтары. Бұл – кітапқа Мұсаның атын бере отырып, осы арқылы талай жандарды өзіне тартудың амалы.

Помераниядан келген хатта былай делінген: “Оқушы кезімде шешем үнемі жабырқаңқы жүретін, оның еңсесін мазасыздық рухын басқанын сезінуші едім. Ол уақытта мен Мәсіхтің Қанының күшін түсініп, білген жоқ едім, сондықтан шешеме материалдық жағынан көмектесем, көңілі орнығар ма екен деген ой болды. Біздің үйімізде “Мұсаның 6,7-кітабы” бар еді. Мен оны көп мәрте оқыдым. Әрине, көбі ұмыт болды, бірақ бір оқиға әлі күнге дейін есімде, сол менің мазамды кетіруде. Мен өзіме беймәлім бір тілден дуаның бір формуласын көшіріп алдым, оған содан соң өз қанымды жағуым керек екен. Түнде сол қағазды басқа жастанып жатқан адам, түсінде бақытты лоторея билетінің нөмірін көретін болады. Осы кітаптан тағы бір сөйлемді балауызға жаздым да, балауыздың бір бөлігін ауруынан айықсын деген ниетпен шешемнің мойнына іліп қойдым. Ал осының арты сұмдық болды. Шешем бірнеше рет өзін-өзі өлтіргісі келіп, ақырында үрей билеген бойы о дүниеге аттанды”.

Мекленбургтен бір ер адам былай деп жазды: “Мен соғыста жүргенімде, әйелім тілме ауруына шалдығып, оны сиқыршыға оқытқан көрінеді. Бұрын әйелім Құдайдан қорқатын, дінге сенетін еді. Сиқыршы араласқаннан кейін мүлдем өзгеріп кетті, ұлым екеуі сенушілерді қас-жауларындай санайды. Ерте кездерде ол сенушілердің жиналыстарына баратын, ал қазір оның не екенін ұмытқан. Бірде пастор

үйімізге келгенде, әйелім қатты ашуланып, оны үйден қуып шықты”.

Біз бұдан сиқыршылықтың ауыр зардабын байқаймыз және бұл қара күштің істері шайтанмен тығыз байланысты екенін көрсетеді. Осы мысалдардан және куәлердің сөздерінен мынаны аңғарамыз: мұның бәрі әлдекеімдер ойлайтындай, зиянсыз істер емес, бұлардың Құдаймен немесе Киелі кітаппен ешқандай қатысы жоқ. Тағы да бірнеше мысал келтірейін:

Соғыстан жүйке ауруына шалдығып оралған бір жас жігітке таныстары бұл ауруынан айығу үшін сиқыршыға баруға кеңес береді. Ол қатарынан үш жексенбі сайын алхоры ағашын құшақтап: “Тас ағаш, мені мазалап жүрген бойымдағы дертті саған айтып тұрмын. Бірінші ұшып кеткен құс менің ауруымды алып кетсін, Әке, Ұл және Киелі Рух атынан”, - деп айтуға тиісті болды.

Померанияның бір елді мекенінен мынандай хат келді: “Сиқыршылық пен дуалаудың салдарынан мұндағылардың көбісі шайтанның шырмауында жүр. Бізде сұмдық істер болып тұрады. Сиқыршылық дегеніңіз өріс алып барады. Көбіне өздері “Қара магия” иесіне барады, кейде оларды өздері шақырып алады. Бүкіл елді-мекен жын-шайтанмен байланыста деп айтуға болады”.

Осы куәгерлік хаттарды оқығаннан кейін, бұл жерде шайтанның қара күшінің қалай өрбігенін түсінген боларсыздар. Мүмкін, кейбіреулердің бұған сенбей, басқаша ойлауы да ғажап емес. Мысалы мына бір әйелдің жазған хатындағыдай: “Адамдардың дуагерлерге барғанын неліктен үлкен күнә деп санайтындарыңызға мен түсінбеймін. Қазір мұның әдетке айналғаны соншалық, оны күнә деп санайтындар саусақпен санарлық қана. Өз басым болса, карта ойнауды, картамен бал ашуды, сиқырлауды мойындамаймын, рас, ертеде дуагерге барғаным бар. Мұнымен негізінен мейірімді, қарт адамдар айналысады. Олар ешқандай талап қоймайды, қанша берсең де соны қанағат етеді. Өйткені, Киелі кітапта да былай делінген ғой: “Сендер қолдарыңды жайып бата бергенде,

олар сауығады”. Дәрігер жаза алмаған ауруды сиқыршының бірден анықтап, айықтырғаны туралы да білеміз”.

Сиқыршылық туралы осы әйелдің пікіріне қосылатында осы келтірілген мысалға қарап, не жолы тек Киелі кітапта айтылғандай қолды салса болғаны, бәрі орнына келеді деп ойлайды. Осы келтірілген куәліктерден кейін, адамдарды шырмауына түсірген қара түнек күштің ықпалы бар екені айқын көрініп тұрған жоқ па?

Сиқыршылық, дуа жасау үлкен күнә екенін мойындамайтындыр үшін келесі бөлімді жазып отырмын. Мұндағы хаттар мен куәгерлердің сөздерінен сиқыршылықтың соңы қандай сорақылыққа апаратынын көреміз.

Сиқыршылықтың салдары

Сиқыршылықтың салдары (зардабы) түрліше болуы мүмкін. Осымен айналысқандардың өздері не дейтінін сіздерге айтайын.

Дұға жасауға күштің жоқтығы

“Сиқыршылықтың салдарынан мен шайтанның шырмауына әбден түстім, содан қазір тәнім де, жаным да қиналуда. Мені өзімді-өзім өлтірсем деген ой меңдап алды. Мен бұл ойдан өте құтылғым келеді. Мен нағыз бақытсыз жанмын. Мінәжат етуге дәрменім жоқ, жүрегімді зіл қара тас басып алған. Мен Құдайға, Құтқарушыма жан-тәніммен құлшылық етер едім. Ал Онсыз менің өмірім өкінішті және құлазыған екенін сезінемін...” Бұдан әрі бұл бейшара дұға жасаушыларға дұғай сәлем жолдап, осы қара түнектен құтылуына көмектесу үшін, біздің ол туралы дұға етуімізді өтінеді.

Екінші хатты оқиық: “Киелі кітаптан оқығанымды табан астында ұмытып қаламын. Сондай-ақ, жиналыста айтылған сөздер де жүректі селт еткізбейді, жадымда қалатындары шамалы. Бірақ мен бәрін есіме сақтап, жүрегіме қабылдауға тырысып-ақ бағудамын. Шіркін, бала кезімдегі сенімім қайта

оралсағой! Ол ойым неліктен орындалмайды дейсіз бе? өйткені менің бұрын сиқыршыларға ісім түскені бар, өзім де сонымен айналысқан едім...”

Құдай Сөзін түсіне алмаудың және Киелі Жазбаны үйреніп, есте сақтауға ықылас жоқтығының себебі, сиқыршыға ісі түскеннің салдары екені айдан анық болып отыр. Шайтанның жанды шырмағаны соншалық, Құдай Сөзі енетін саңылау да қалмаған. Сондықтан да Ол түсініксіз болып қала беруде.

Вестфалиядан келген хатта біреу былайша шағымданады: “Осыдан жиырма жыл бұрын өте қатты ауырған едім, таныстарым маған емшіге баруға кеңес берді. Мен солай еттім де. Сол кездегі күнәм Құдайға құлшылық етуіме кедергі келтіргенін бүгін де сезініп жүрмін. Тәңірге дұға етіп отырғанда “дұғадан келер пайда жоқ-ау осы” деген ойдың мазалайтыны да бар. Мені осындай қырсық ойдың бұлты торлап, жиі азапқа салуда”.

Жан тыныштығының жоқтығы

Вютембергтен рухы түскен бір адам былай деп жазады: “Тыныштық деген мүлдем жоғалды. Менің күнеларымды кешіре гөр деп Құдайға күнде құлшылық етіп, өз-өзіме Құдаймен татуласпай төсекке жатпаймын деп күнде қайталаймын. Талай түндерді жылап-сықтаумен өткіздім. Ойымның осалданғаны соншалық, тіпті ойлануға да шамам жоқ. Құтқарушымның күнәмді кешіргеніне сенейін десем, еңсемді бір зіл батпан ауыр жүк басып, өктемдік етіп тұрғандай күй кешудемін. Ақыл бөлісетін бір адам кездессе деп жиі ойлаймын. Қолдарым, аяқтарым да ауыр жүк басқандай, күнәм күні-түні көз алдымнан кетпейді. Шіркін, Тәңірімнің жүрегі жібіп, мені аяса ғой. Менің ойларым сұмдық, олардан арылайын десем, олар мені шеңгелінен шығарғысы келмегендей, құтырта түседі. Құдайға жақындауға талпынған сайын, бұл ойлар маған бұрынғыдан бетер беймазалық әкелуде. Су жанынан өтіп бара жатсам: “Суға секір, сонда бәрі тынышталады”, – деген дауысты естігендей боламын. Пышақты көрсем, кеңірдегіңді

қиып жібер деп айтып тұрғандай болып көрінеді де тұрады. Міне, осылайша шайтанның сапалағы күні-түні қыр соңымнан қалар емес. Жырларды тыңдай алмаймын, тыңдасам болды, жылағым келеді. Қуануға да, масайрауға да болмайтындай. Өзімді-өзім өлтіруім керек, сонда ғана бәрі тынышталады”. “Өткен жылы демікпемен ауырып едім, біреулер емші әйелге барсаң айығасың деген кеңес берді. Кішкентай кезімде шешемның де мені емшіге жұмсағаны бар... Міне, енді соның бәрінің салдары шығар, өзімді-өзім өлтіру туралы ой басыма ұялап алды”.

Өзін-өзі өлтіру туралы ойлар

Бұл сұмдық ойлар сиқыршылықтың күнәсінің салдарынан жиі туындайды. Өздеріңіз байқаған боларсыздар, бұл ойлар өзін-өзі өлтіруге немесе қырсықтық жасауға кеңес береді. Кей адамдар тоғайға жоламайды, бара қалса, бір дауыс: “Кел, мына ағашқа асыл, сонда бәрі аяқталады”, - деп сыбырлап шақырғандай болады. Олар темір жол маңына бара алмайды, өйткені бір дауыс оларға пойыздың астына түс деп сыбырлайды. Шайтан осындай сұмдық ойлар арқылы мақсатына жиі жетіп те жүр. Осындай сұмдық ойлардан құтылу үшін адамдар өздеріне-өздері қол жұмсайды.

Қырсық ойлар

Кейбір адамдарды қырсық ойлар билеп алады. Әдетте бұл ойлар Құдайға, Құтқарушыға және Киелі Рухқа бағытталады. Мұндай қырсық ойлар туралы жазғым келмейді, өйткені, шайтан түрлі кертартпа сөздерді пайдаланып, оларды адамдардың есіне салады, ал содан соң одан құтылудың өзі екіталай. Мұндай оймен уланғандар: “Бұлай ойламас та едім, ол менің жүрегімнен шықпағаны белгілі”, - деп ақталады. Біреу құлағыңа сыбырлаған осындай ойлардан Құдайым сақтасын. Әдетте, бұл ойлар адам мінәжат еткенде, Құдайға жалбарынғанда, Киелі кітапты оқығанда немесе қауымда Құдай Сөзін көңіл қоя тыңдағанда келеді. Шайтан осы ойлар арқылы көптеген адамдардың жүрегіне

енеді, сөйтіп, олар жиналысқа баруды доғарады, Құдай Сөзін оқымай қояды, қырсық ой туындамас үшін мінәжат етуден де бас тартады. Сөйтіп, Құдай балаларын бір-бірлерінен алыстатып, Құдайдан бездіріп, дұшпан өз дегеніне жетеді. Адам тірі Құдаймен сөйлесуді қойып, төмен құлдилаытыны соншалық, тіпті бара-бара ол қара ниетті күштің қолындағы ойыншыққа айналады. Бұл қырсық ойлар сиқыршыға ден қоюдың зардабы. Егер кімде-кімді осындай ой мазаласа, онда оның сиқыршыға барғанын, осы арқылы шайтанның шырмауына түскенін айна-қатесіз айтуға болады.

Құдайдың Сөзін түсінбеушілік

Дуалаушыға барғаннан кейін, адамдар Құдай Сөзін түсіну қабілетінен айырылады. Бір кездерде сиқыршыға барған бір әйел былай деп жазады: “Шамамен бір жылдай уақыт болды, шайтанның шырмауынан шығу ниетімен тұрақты түрде Құдайға құлшылық етемін, бірақ ісімнің оңға басар түрі жоқ. Бұл туралы көп жазуға да болар еді, алайда мен мынаны ғана айтсам деймін: Құдай Сөзі бойынша өмір сүру туралы шешімге келген мезгілден бері, басым жиі ауыратын болды. Шайтан Құдайға қарсы ойларды жиі жібереді, ал мен оны қууға күш салып-ақ бағамын, бірақ дәрменсізбін. Шешемнен мұның неліктен екенін және дуагермен байланыста болып па едім деп сұрағанымда, ол бала кезімде мені емшілерге жиі апарғанын айтты”.

Саксониядан бір әйел былайша шағым жасайды: “Менің ештеңеден тайынғым келмейтін кездерім жиі болып тұрады. Табыссыз талпыныстардан соң өмір сүргің келмейді екен. Айқыш ағашқа керілген Исаны сеніммен көз алдыма елестетсем, күнеларым үшін Оған әлі де борышты екенімді айқыш ағаш менің ойыма салады. Исаның мен үшін де шегеленгені мені одан бетер қинайды. Ертеректе мен бал ашумен және т. б. жиі айналысушы едім. Енді сол қылықтарым үшін балам азабын тартып жүр, өткені оның жүйкесі әбден жұқарып бітті. Өткені жылы мен Құдайдан біржола қол үзген едім. Сонда түсіме Мәсіх кіріп: “өзіңнің өткендегіңнің бәрін ұмытып, Менің

еркіме мүлдем берілуге көнесің бе?” – деп сұрады. Мен: “Жоқ!” – деп жауап бердім. Осы “жоқ” деген сөзім түсімде айтылғанына қарамастан, мені күні бүгінге дейін қинап жүр. Мүмкін, осы “жоқ” деген сөз – менің күйінішімнің себебі шығар. Егер Тәңірдің өзі маған тезірек көмекке келмесе, өзімді-өзім өлтіріп, қарамды мәңгілікке жоғалтатынымды сеземін. Күресуге дәрмен жоқ, ниетім де жоқ, өйткені шаршадым. Қиындықты көп көрдім”.

Өлім туралы ойлар

Помераниядан келген хатта, жылдар бойы “біреу мені улап өлтіреді” деген ойдан арыла алмай жүрген әйел үшін мінежат етуді өтініпті. Әлгі әйел апта сайын жындыхана директорына барып, оны ауруханаға салуды сұрайтын көрінеді. Директордың сырқатты сауықтыру туралы әрекеті іске аспай-ақ қойды. Байғұс әйел адамдардың көзіне түсуге жүрексінеді, өйткені, бәрі де оны у беріп өлтіргісі келетін секілді болады да тұрады. Бірде осы сырқаттың сыры туралы әңгімелескенде, әйелдің жас кезінде сиқыршыға барғаны белгілі болды. Емшілер оның тілмесін жазуға көмектескен көрінеді. Бұл әйел дінге сенуші, қауым мүшесі екен, сонда да дуалаушыға баруды күнә деп санамаған. Оның осындай ауруға шалдығуының себебі сиқыршылықтың салдары екенін оан түсіндіру еш нәтиже бермеді.

Мұнда тұрған ештеңе жоқ деу шайтанның қулығы. Егер адамдар мұны білсе, олар тәубе етіп, Құдайға жалбарынар еді де, шайтанның сағы сынар еді. Шайтан үнемі кедергі жасап: “Оның себебі бұл ғана емес”, - дегенді әркімнің аузына салуға тырысады. Қаншама көлгірсігенімен, оның себебі осында. Куәгерлердің сөзіне және дуагерге барғанның ақыры немен бітетінін көре отырып, оны түсінуге әбден боладығой деп ойлаймын. Адамның өзі барып шайтанның шырмауына түседі, ал сосын одан құтылу оңайға түспейді.

Шайтанмен шатасқанның күні қараң. “Дұшпан менің жүрегіме кіріп алып, оны ластап бітті. Енді менің жүрегімді сенімсіздік жайлап, шын сенімге ие болудан қалып бара-

мын. Иса мені сауықтыруға тырысса, шайтан бар амалын қарастырып, көзімді жоюға жанталасып бағуда. өз бөлмеді жың жайлап алғанын сеземін, олар менің тәнім мен жанымды азапқа салады. Түн баласы бойымды үрей билеп, жың-шайтан мені мәңгілік өлімге алып кететіндей болады да тұрады. Осы бір сұмдық қиналыстан тез арада арылсам ғой, шіркін! Тілегім тозақ тырнағынан қалай да құтылу. Тәңірімнің: “Қазірдің өзінде айбалта ағаштың түбінде жатыр; жақсы жеміс бермейтін әрбір ағаш кесіліп, отқа тасталады...” деген сөздері ойға келеді. Қазір де мен осындай оттың ортасында тұрған сияқтымын, алайда одан құтылсам деген ықыласынтам зор”.

Сиқыршылықпен айналысып жүргендер, алда өздерін қандай сұмдық азаптың күтіп тұрғанын сезсе ғой. Шайтанның өз қолына түскендерді қалай келемеждеп, қорлайтынын айтсаңшы. Неге ғана осы күнәдан құтылуға көбісі талпынбайды!

Вюртембергтен келген хатта жантүршігерлік жәйіттер баяндалған: “Мен қапылыста азғырушының қолына түсіп қалып отырмын, ал ол болса, өз шеңгелінен шығарар емес. Құдайдың атын атап, Одан көмек сұрайын деп тұрып, қайдан аузыма түскенін қайдам: “Сүйікті шайтан, мені құтқар, маған көмектес”, - деп қалдым. Содан бері шайтанның шырмауындамын. Қамшының сабындай қысқа өмірім өксікке толы деп айтуыма болады. О, қара күштер, Құдайға қырын келетін ойлар! Шын көңіліммен босат деп жалынсам да, қара ниетті күштердің мені жіберер ойлары жоқ. Жабырқаңқы көңіл бір сәт селт етер емес, уайым күні-түні иектеп, еңсемді көтертпей-ақ қойды. Неліктен Тоқтының Қаны мені жуып, Киелі Рух жанымды жадыратпайды? Күні бойы мақсатсыз күн кешемін, жаным жабырқаңқы, денем дел-сал. Оған қоса, осы бір қырсықтың салдарынан Құдайға да тіл тиіп жатыр. Жүректі жексұрын қара түнек сезімі билеп алған. Осы ауыр қапастан шығудың жолы қайсы? Жүрегім пәк болып, бүкіл жан-тәніммен Тәңірге қызмет етсем, Соның айтқанымен жүрсем деймін. Менің бір ғана тілегім осы”.

Сиқыршылықты, бал ашушылықты зиянсыз іс деп есеп-

тейтіндер, бәріңіз тыңдаңыздар мұны! Дене сырқатынан айығамын деп шайтанның шырмауына түскендер, сендер де бұған құлақ салыңдар! Шайтан – қатігез билеп-төстеуші. Алғашында ол аңқау адамдарды алдаумен торына түсіреді. Адамдарға бұл Құдайдың ісі, өйткені дұға оқылып, Құдайдың атымен істеледі деп сендірмек болады. Тек содан соң ғана ашықтан-ашық келемеждеп: “Сенің күнәң кешірілмейді. Одан да жіпті алып, буынып өл”, - деп өзеурейді.

Кезінде шайтанның өзезіл сөзіне ерген адамдар, құлшына тәубеге келіп, Құдай сендердің күнәларыңның тұзағын үзуі үшін сиыныңыздар! Құдайға шүкір, Оның неше түрлі тұзақтарды үзуге шамасы келеді!

Шайтанның шырмауынан құтылу туралы айтпас бұрын, алдағыны болжап айтатындар, қартамен бал ашушылар, аруақ шақырушылар ісімен танысайық. Бұлар бізді неге апарып соғар екен, соны қарастырайық.

Картамен бал ашу және оның зардабы

Осы мәселе туралы бірнеше хаттан мысал келтірелік: “Менің әкем сиқыршылықпен айналысқан болатын. Ол “Мұсаның 6,7-кітаптарын” оқып, сиқырлау жөнінде түрлі формулалар жазды. Шешем де шайтанның қармағына ілініп қалып, өте қиналып өлді. Шешем өлгеннен кейін, мен сары уайымға салындым. Жарқыраған күн де, Құдай жаратқан табиғаттың тамашалары да менің көңілімді жадырата алмады. Бұдан тек өліп қана құтылуға болады деген ой мені әбден мазалайтын. Әйтеуір Құдайдың шапағаты мені сақтап, Соның мейірімі ғана мені мәңгілік ажал тырнағынан арашалап қалды. Сол кездері мен бал ашушыларға жиі баратынмын, “аспан хаты” дегенді бойымда сақтап, күнәнің терең тұңғиығына баттым.

Осыдан бірнеше жыл бұрын, мен Тәңірге қызмет етуге біржола бекіндім. Күнәнің күлін көкке ұшырып, жарық дүниеге ұмтылдым. Қазір де Иса Мәсіхтің игілігіне айналғаным сенемін, дегенмен толық қуаныш құшағындамын деп айта

алмаймын. Өлі де тынышымды кетіретін дегбірсіздік толастар емес. Өлімді ойлағанда, содан құтылып кетерлік сенім жетіспейтіндей. Өзімді жиі көңілсіздік, әлсіздік басып бара жатқанын сезінемін. Құдайға құлшылық ету жиындарына бару, Киелі кітапты оқу, мінәжат ету мен үшін міндет секілді, бірақ осыларға деген құштарлық байқалмайды. Толық құтқарылуды қалаймын-ақ, бірақ дәрменсізбін”.

Мұнда ілгері басқан аяқты кері кетіретін бір өктемдік бар сияқты, алайда Құдайға шүкір, Иса барлық түйінді өзі шешуде.

Берлиннен бір қыз былай деп жазды: “Мен Құдайға деген сүйіспеншіліктен емес, қорыққанымнан құлшылық ететінімді мойындауға тиістімін. Оның әділ соты туралы ойлағанымда денем түршігіп кетеді. Бірде Еврейлерге арналған хаттың 10-тарауының 31-аятын оқып едім, онда: “Тірі Құдайдың қолына түсу қорқынышты!” – деп жазылыпты. Мен бұл айғақтың маған да қарсы қолданылатынын сездім. Құдайға сенімсіздік көрсету – менің басымдағы жағдайдан әлдеқайда жеңілірек, артық деп те айта аламын. Мен ауырып қалмаймын ба және Құтқарушыма толық дәрежеде қашан берілемін, өйткені менің жүрегім жан тыныштығын көксейді деген оймен, мен бал ашушыға барғанымды да жасырмаймын”.

Шайтанның шеберлігі қандай! Рухың Құдайды қалайды, ал сол кезде шайтан құлағыңа сыбырлап: “Бал ашушыға бар, сенің уақытыңның қашан келетінін біліп ал”, - деп азғырады. Сөйтіп, шайтан Тәңірге берілер мүмкіншілікті мүлт кетіреді де, адамның өмірі албастының қолындағы ойыншыққа айналады. Шайтанның қулығына құрық бойламайды дейтініміз де сондықтан.

Тағы бір хатты оқиық: “Күйеуімнің әке-шешесі ертеректе бір діндар отбасымен араласып тұрушы еді. Олар аяқ астынан бізбен араласуды қойды. Көп кешікпей менің қайын енемді бір кемпір картамен бал ашуға үйретті. Бұдан әрі енем өзінің ғана емес, өзгенің де алдында не күтіп тұрғанын айтатын болды. Содан менің күйеуім, студент, Құдайдың құдіретімен Мәсіх жолын қуушы студенттердің қоғамы арқылы Тәңірге жалбарынғанда, қайын енем жындануға дейін жетті.

Ол ұлының дінге сенгіштігі оны жақсылыққа апармайтынын айтты. Менің күйеуім бұл қоғамнан шығу керектігі туралы шешесінің айтқанына көнбеген соң, ол ұлын қарғап-сілеп, оны өзінің қас дұшпанындай көрді. Ұлының өтінішімен ол кейде Киелі кітапты оқыды, тіпті ендігәрі бал ашпауға уәде берді, бірақ арада біраз уақыт өткен соң, бұрынғы кәсібін қайта бастады. Енді енем Мәсіх жолын қушылар жолынан толықтай шығып, спириттермен кездесуді шығарды. Бірде ол өзіне-өзі қол жұмсай да жаздады. Кейде ол бізге жүрек тебіренерлік хат жазады, ал кей кездері ешбір себепсіз, біздерді қарғап-сілеген хатын аламыз. Тәңір бізге әсіресе оң көзімен қараған сәтте, қайын енемнен осындай қарғыс арқалаған хаттар келеді. Ол Құдайдың бізді жебегенін толықтай білмесе де, сезінетін болса керек. Бірде ол бізді қойып, бала-шағамызға дейін қарғады. Содан соң тәубеге келіп, қарғыстарын қайтарып алды. Біздің келісімімізсіз біздің болашағымыздың қандай болатынын білмек те болды. Күйеуім оның мұндай әрекеттеріне тыйым салған еді, онысын қойды ма, қоймады ма, ол жағынан бейхабармыз”.

Міне, көрдіңіздер ғой, шайтанның азғыруына ерген ана өз балаларын қарғап-сілеуге дейін барады! Мұны сұмдық демей не дейміз? Мәсіхтің жолын қуған ұлының дінге сенген қызға үйленгеніне қуанудың орнына, шешесі оларды өлердей жек көреді.

Картамен бал ашушыға ісі түскеннен кейін, адамдар қаншама жан тыныштығын ойласа да, оны ала алмайтыны заңдылық. Бір әйел Саксониядан былай деп жазды: “Менің кішкене болса да жаңаруға қолым жетті, бірақ құтқарылу туралы сенімім аз, жүрегім орныға қойған жоқ. Ертеректе сиқыршыларға барып, талай рет карта аштырып едім. “Қайткенде еркін боласың” деген кітапшаны да оқып шықтым, бірақ еш нәрсе көмектесер емес. Шіркін-ай, Құдай баласы болу қуанышына кенелсем ғой! Сол арман жолында төккен көз жасым мен мінәжаттарым нәтиже бере қойған жоқ. Шіркін, еркіндік алып, осы қуанышты басқалардың да басынан көрсем ғой!”

Адам жанының Исамен бірге болып, күнәлары кешіріл-

генімен, жан тыныштығын таппауы қандай қорқынышты. Шайтан: “Сенің тәубе етіп, Құдай баласы болғың келген екен. Оған жібере қоймаспын! Сен маған қатыстысың, сондықтан мен өз құқыммен билік жүргіземін!” – деп тұрғандай. Жан тыныштығы болуы үшін, шайтанның шырмауынан босанып шығу үшін, үздіксіз мінәжат ету қажет. Ал шайтанның сөзіне, еркіне ергендердің жаны да, тәні де шырмауда, қол-аяғына кісен салынған. Сөйтіп ол алдымен адамға алтыннан тау тұрғызып беремін деп уәде етеді де, артынан тақырға отырғызып, өзінің өтіріктің әкесі екендігін көрсетеді.

Бір бейшара жесір әйел былай деп жазды: “Міне, жиырма жеті жылдан бері айықпайтын ауруға шалдықтым. Мұның бір кездегі сиқыршылықтың салдары екенін де білемін. Сырқат алғаш жабысқанда, мен жиырма алтыда едім, енді міне, елу үштемін. Жиырма жеті жылдан бері шайтан тәнімді, жанымды және рухымды азапқа салуда. Мектепте оқып жүргенімде Киелі кітапты оқуды ұнатып, Құдай жолына түсуге талпынушы едім. Киелі кітаптан көптеген аяттар мен дұғаларды жатқа айтатынымын. Содан соң көп жылдар бойы жүрегімді шайтан билеп алды. Қай жерге бармайын, ол мені қорқытып-үркітіп, қинайтын болды. Осы жылдардың ішінде мені үрей мен жабырқаушылық меңдеуде. Кей кездері есімнен айырылып қалмасам игі еді деп те қорқамын. Оның үстіне денем дертке шалдыққан. Құдайға қарсылық білдіріп, тіл тигізетін ойлар жанымды түгел жайлап алған. Өзім жатқа білетін Киелі кітаптағы дұғаларды айтып, қорғанып та көрдім. өзгелердің де мен үшін мінәжат етулерін өтіндім. Бірақ осы уақытқа дейін ешбіреуінің шапағаты тимей-ақ келеді. өзімді буып тастаған шайтанның шырмауынан Құдайдың мені босататынына кәміл сенемін. өйткені, Оның ондай билігі бар, бірақ сол сағат қашан соғар екен?”

Бүкіл өмірдің шайтан шырмауында өтуі қандай өкінішті! Егер өмірімізді Тәңірге сеніп тапсырсақ, Ол біздің игі Бақташымыз болса, онда өмір ағысы да басқаша болады ғой. Сонда біз де Дәуіттің 22-жырында қуанышпен айтқанындай айта алар едік: “Жаратқан Ием – менің Бағушым, мен еш нәрседен де тарықпаймын. Ол мені жасыл жайлауға жаяды,

тұнық суға жетелеп апарады. Тәңірім жаныма күш дарытады, есімі “Қасиетті” болғандықтан. Мен сенімімді артамын да Оған: Ол мені тура жолмен жетелейді”. Жырда: “Тәңірім жаныма күш дарытады”, - делінген, ал әйелдің хатынан: “Ол менің жанымды қинап, қорқытады”, - деген сөздерді оқимыз. Сіздер бұлардың бір-бірінен қандай айырмашылығы барын байқадыңыздар ма? Мұның бәрін, бал ашумен аналысатындар, немесе осындайларға баратындар, түгел естіңіздер!

Балтық жағалауынан бір бауырымыз былай деп жазады: “Бізде де сиқыршылық күнәсіне белшесінен батқандар көп. Олар мұның Тәңір алдында жексұрын күнә екенінен бейхабар. Жақында өзін нағыз сенушімін деп есептейтін бір әйелмен сұхбаттасуға тура келді. Оны Құдай Сөзі уағыздалатын барлық жерден: қауымнан, бақташының алдынан, Киелі кітап сабағынан, қауымның кештерінен кездестіруге болады, алайда Құдай алдында ол ерекше жағдайға ие болды деп айтуға ауыз бармайды. Әйелмен сөйлескенімізде, ол бұрын сиқыршыға барған болып шықты”.

Сиқыршылықтың күнәсін адам өзі ғана арқалап қоймайды, оның кесірі туыстарына да тиеді. “Менің қайын енем бал ашып, түрлі аспан хаттарын жазған еді. Соның зардабынан өз өмірінде қаншама қайғылы және қорқынышты күндерді басынан өткізді десеңші! Осы бір кесапатқа оның өзі ғана емес, оның ұлы да, қызы – менің әйелім және жақындары да кезікті. Бір өкініштісі, олардың Құдай туралы бір анық түсінігі болмауында. Олар бір жиыннан екінші жиынға, кәдімгі қауымнан адвентистерге дейін барды, бірақ бұдан ешқандай нәтиже шықпады”. Қандай қорқынышты қарғыс десеңші! Шын жүректерімен ақиқатты издесе де, оған кезігер емес. Оны күнә деп шын жүректен тәубеге келмесе, сиқыршылықтың күнәсі көздерін байлап, жандарын жаралайды. “Менің апайым түрлі қара ниетті істердің құлы. Ол арақ пен темекіге үйір болып алды. Оның ұлы мен келіні де шайтанның жетегінде кеткен. Сиқыршылық не жасамайды дейсің? Менің ағам магнетопат еді. Мұның не сөз екенін қайдан білейін, әйтеуір оның жарнамасынан: “Дұға көмектеспейді” деген сөзді оқығанда, мен мынаны анық түсіндім. Яғни ағамның Құдай Сөзі туралы

ештеңе білгісі келмейді. Хаттарынан да осы пиғыл сезіледі”.

Баденнен келген хатты оқиық: “Менің көршім, егде тартқан әйел, бал ашумен айналысады. Оны алдағыны айтып берер көріпкелі бар деп мақтайды. Менің шешем сенуші әжеммен ақылдаспай, осы көрші әйелден болашағымды болжап бер деп көмек сұраған көрінеді. Бұдан кейін ол әйел біздің үйімізге жиі келетін болды. Әжем оған біздің табалдырығымызды аттауына тыйым салуды өтінді. Осы әйелмен араласқаннан кейін, үйіміз дүлей күшке толып кеткендей, біз дұға оқудан қалдық. Мен балалардың кенжесі едім. Алты жасымда демікпе ауруына шалдықтым. Бой жете бастаған кезімде, шешем бал ашушыға барып, менің күйеуге қашан шығатыным туралы білмек болды. Мен он бес жасқа толғанда әжем өліп, мінәжаттың мейірімді рухы сонымен бірге кетті де, үйімізді шайтан жайлап алды. Ең ақыры аяғында мені де бал ашушыға баруға көндірді. Мен мұнда тұрған ештеңе жоқ, бір күнәнің әрісі не, берісі не деп, бал ашушыға бардым. Ол өткенімді түгел және болашағымның бір бөлігі туралы айтты да, кенеттен әңгімесін үзіп: “Біреу көз алдымда бір жапырақ қағаз ұстап тұрғандай, одан арғыны көре алатын емеспін, енді еш нәрсе де айта алмаймын”, - деді. Кейін ол менің тәубеге келгеніме дейінгінің бәрін дұрыс айтып бергеніне көзім жетті. Соған дейін өзімнің шайтанның шырмауында болғанымды білдім. Мен оған барғаннан кейін, бірнеше күннен соң әлгі әйел басқыштан құлап, мойнын үзіп алды деп естідім. Мені қорқыныш тұмшалап алды. Ақылымнан алжа-спасам жарар еді деген үрей пайда болып, ұнжырғам түсіп жүрді. Менің аяғымның астындағы тірек шайқалғандай болды. Біздің отбасымыз бытырай бастады. Шешем мен бір ағам Америкаға кетті. Мен де сол жаққа барып, бірақ көп кешікпей қайтып оралдым. Менің жағдайым сұмдық болды. Мінәжат ете бастасам-ақ қызуым көтеріліп, ауа жетпейтіндей халге түсемін. Өлім аузында жатқан кездерім де жиі болды. Осы бір оғаш сырқаттан қатты қорқамын, ол тез арада ауыр халге түсіреді де, аяқ астынан жоғалып кетеді. Өпкенің басында да

түсініксіз жағдайлар болып тұрады... Ол ештеңені көрмей, сезбей, айнала береді, одан әрі не болары белгісіз...”

Міне, бұл күнәнің көптеген отбасын және олардың ұрпақтарын қайда апарып соқтыратынын көріп отырсыздар ма? Үрей мен торығушылыққа толы тағы бір хаттан мысал келтіріп, бұл тақырыпты осымен тәмәмдаймын. Бал ашу, сиқыршылық және т. б. арқылы әркімнің шайтанмен байланысатыны түсінікті шығар деп ойлаймын.

“Жүйке тамыр жүйесінің шайқалғаны соншалық, есімнен адасатын шығармын деп ойладым. Бала кезімде жиі ауыр бергендіктен, шешем мені шипасы болар ма екен деген оймен емшілерге апарғанын білемін. Мен онымен осы туралы шындап сөйлесіп едім, шешем бұл күнәні растады. Бірақ рухани жағынан шешем қазір әлсіз болып қалды. Менің қатты қиналғанымға қарап, байғұс шешемді оның ар-ожданы мазалайтын болды. Ол жылайды, мінәжат етеді, ал маған ептеп жеңіл бола бастаса, тағы да баяғы қалпына түсіп, немкеттілікке салынады...”

Бұл хатты одан әрі оқығым да келмейді. Өзіне-өзі қол салудан тайынбаушылық, спиритизм, көз байлау және жүйкенің жұқаруы – хаттың мазмұны осыған келіп саяды. Бұл хатты тез оқып шығуға болады, бірақ осыны жазған адамның ішкі жан күйзелісін сезіне отырып оқу - өте қиын. Біз Құтқарушымыздың барына қуанамыз; Ол үшін өмір сүріп, Оған қызмет ететінімізге қуана аламыз; Оның біздің дұғамызды еститінін сезіне аламыз, Ол біздің сүйікті Бақташымыз. Осыны қалайтын адамдар да бар ғой, бірақ шайтан бұларға бұғау салып, ойын тұмшалап, өз-өзіне қол жұмсауға итермелеуде. Оларды көргенде жаның ашып, жүрегің сыздайды! Біздің қауіпті дұшпандарымыздың құрбандығына айналып, еріксіз шырмалған адамдар үшін ұдайы мінәжат етуіміз қажет. Мәселен, ата-аналары бір пайдасы болар ма екен деп, балаларын сәуегейлерге ертіп апарған. Құдай балалары, қуаныш пен күш Тәңірде екенін айта алатындар, еркін болғысы келгенімен, салынған кісеннен құтыла алмай жүрген байғұс құрбандар туралы ойлаңдар. Оларды өз мінәжаттарыңнан қалдырмаңдар. Осы қасиетті тапсырманы мойындарыңа

алындар, бұларға да Құдай Құтқарушы және Жұбатушы ретінде ашылуы үшін мінәжат етіңдер.

Спиритизм істері

Бұл тарауда мен сіздерді аруақтарды шақырумен айналысатындармен, яғни, өлгендердің аруақтарына сұрақ қоятындармен таныстырмақпын.

Бір әйел былай деп жазады: “Мен жиырма жыл бойы бал ашумен жәнеғруақ шақырумен айналыстым. Адамдар маған бірінен соң бірі келіп жатты. Менің айтқандарымның көпшілігі жүзеге асты. Жоқшылық не істетпейді, ақша жетіспегендіктен, ол қазір де жетіспейді, мен мұнда тұрған еш нәрсе жоқ деп ойладым. Бірде маған бір сенуші әйел келіп, бұл күнәһар жексұрын іспен айналысуды тастауымды өтінді. Ол менің аруақ шақыратын кітабым мен картамды алып кетті. Осыдан кейін апта бойы жанымды қоярға жер таппадым. Мұның енді қайталанбайтынын айтып жылап отырып Құдайға тәубеге келдім де, уәде бердім. Көп кешікпей мен қауым мүшесі болдым. Күйеуім бұған қарсы болса да, мен оған өкіне қойғаным жоқ. Ол өлерден шамалы уақыт бұрын: “Менімен бірге сенушілердің жиналысына барғың келмей ме?” – деп сұрадым. Ол болса, Құдайға тіл тигізетін кесір сөзбен жауап берді. Бірде күйеуім бір жаққа кеткен еді, үйге сұмдық халде оралды. Демі біткенше ақыл-есі болғаныммен, тілі байланып, сөйлей алмай қалды. Мен тізерлей отыра қалып Құдайға жалбарынып, оның күнәсін кешіруді немесе оны менің мойныма артуын сұрап мінәжат еттім. Күйеуім болса, менің мінәжатымды естіп жылады, осы күйінде ол мәңгілікке кетті. Күйеуім өлгеннен кейін, диван астынан ырыл, гүбір дегендерді жиі еститін болдым, бірақ Құдайға сене бастағаннан кейін қорқа қойғаным жоқ. Бал ашып, аруақтарды шақырып жүрген кезімде бөлмемнен белгісіз бір сұлбаларды көріп, түсініксіз сөздерді естуші едім”.

Бұл әйел осы уақытқа дейін әлі шайтанның шырмауынан шыға алмай жүргені туралы шағымдануда. Оған келіп жүрген сенуші әйел одан: “Сен дүлей күшпен байланыста

емессің бе?” – деп сұрады. Әрине, ол шайтанның билігінде. Құдай Сөзінде былай делінген: “Мұны жасаған әркім Тәңір алдында жексұрын”.

Шыны аяқты айналдыру

Берлиннен келген хатта шыны аяқты айналдығаннан кейін не болғаны туралы жазылған: “Таныстарымыз арқылы әйеліміз екеуміз шыны аяқты айналдыру туралы естіп білдік. Біз спиритизм – шайтанның ісі екенін білетінбіз, сондықтан онымен айналысқан емеспіз. Бірақ біз үшін бұл бір жаңалық болып көрінді. Шыны аяқ қағазға жазылған әріптердің біріншісінен екіншісіне қарай айнала берді. Бізбен кім сөйлеседі деген сауалға, өлгендердің рухының аттары аталды. Әрбір сұраққа жауап қайтарылды, бөлмеде болғандардың бәрі де жауап алды.

Сол кезде жұбайым екеуміз бұл күштің бізге ашылатынына сенімді болдық. Біз Құдайды іздеп жүргенбіз, сондықтан дүлей күштен қорғанышымыз барын сезгенбіз. Иә, біз Құдайды іздедік, бірақ шын жүректен болмаса керек, әйтпесе осындай күнәға батпас едік. Біз Құдайды шын жүректен іздегенімізбен, біз күнәһар екенімізді түсінбедік, сөйтіп тәубеге әлі де келгеніміз жоқ. Құдай біздің іздегенімізді біліп, осы бөлмеде шыны аяқты қандай күштің айналдыратынын ашады деп сендік. Мұны біздің білуімізге тура келді, алайда дәл біз ойлағандай емес, басқаша жағдайда. Бірде әйеліміз екеуміз оңашада сауал қоя бастадық. Қызу күрес басталды да кетті. Біз шыққан барлық рухты кейін серпіп тастадық та, бізбен кімнің сөйлесіп тұрғанын білмек болдық. Сонды шыны аяқ үстел үстінде бұрынғыдан бетер қатты айналып, жазылған әріптерді итеріп тастап, артынан қайта жинастыра бастады. Біз дүлей күш рухымен сөйлесуден бас тартып, шындық рухын шақырдық. Егер бұл шайтаннан шықса, жауап бермей-ақ қойсын дедік. Ақыр аяғында “Құдай Елшісі” деген жазуды оқыдық”.

Бұл рух біздің айтылмаған ойларымызға да жауап бере бастады. Дегенмен секем алып, бұл рух өзін дұрыс атай

қойды ма екен деп ойладық. Сонда: “Шын сеніңдер, мені Құдай жіберді. Сендер Құдайды нағыз іздеуші болғандықтан, Оның сендерге ашылғысы келді. Құдай кімге ашылатынын Өзі біледі”, - деген жауапты оқыдық.

Бұдан кейін соттың болатын күні есік алдында тұратыны және олар Құдай ісінің куәгерлері болатыны жайлы хабарлар бірінен кейін бірі айтыла бастады. Әділеттілер ретінде, олар Құдайдың келетіні туралы, ұлы сот күні туғанша куәландыру керек екендігі жазылды. Өзін “Құдай елшісімін” деп атаған рух олардың үш жасар қыздарын өзімен бірге алып кететінін, содан соң олардың он бір жасар ұлдарымен бірге пайғамбарлық қызметтерін бастаулары керектігін айтты. Олар Исаның өзі сөйлеген екен деп сенді. Көптеген күндер мен апталар бойы олар осы тыңдағандарының әсерімен жүрді. Олар осы рухтың ықпалына түсіп, уақытымен тамақ ішуді, балаларын тамақтандыруды ұмыта бастады. Күн озған сайын жағдай шиеленісе түсті. Рух әйелге ақымақтық сөздерді де айтқыза бастады, ал әйел болса, бұл оның жүрегінен шықты деп ойлады. Бірде ол қинала былай деді: “Егер менің жүрегімде жамандық жатса, оны салған шайтан, мен ондай емес едім ғой”.

Ақырында олар өздерін шайтан алдап, шырмауына түсіргенін түсінді. Сондықтан олар бәрінен безіп шықты. Осыдан кейін екі күн бойы әйелді жын буды. Ол үрей үстінде: “Иса, Дәуіттің Ұлы, мені аясаңшы!” – деп айқайлады. Сонда жын ғайып болды. Бұл адамдар енді шайтанның бұғауынан босадық дейді.

Міне, шыны аяқтың немесе стақанның “бейкүнә” айналуының салдары осындай.

Спиритизммен айналысқан бір жігітке күтім жасаған жас медбике мұнымен айналысқан адамдармен болатын сұмдық жәйттер туралы былай дейді: “Кешке қарай оның қасында отырып, Құдай Сөзін оқыдым, түні бойы сырқат жігіттің жанында кезекші болып отыруыма тура келді. Осы түнде сырқаттың төсегінен шыққан от жалынын көрдім. Содан соң күйік иісі шығып, бір бейненің жалынды сөндіргенін көрдім. Мен жалма-

жан Құдайға құлшылық еттім. Келесі күні тыныштықта Тәңірді шақырудан басқа ештеңе істей алмадым”.

Бір адам маған бұрын спиритизммен және магнетизммен айналысып, кейін одан безіп шыққан адамдар туралы айтты.

Магнетизм

“Бұл кісі де магнетизер еді. Бұған ол спиритизммен айналысқаннан кейін келді. Жын-шайтан егер ол осы іспен айналысса, оған көп табыс келтіретінін айтса керек. Ал оның әйелі спиритистер үйірмесінде медиум болған. Сырқат адам келгенде ол не істерін білмесе, әйелі екеуі не істеу керектігін аруақтардан сұрау үшін көрші бөлмеге кіретін. Ол болса аурудың түрін айтып, емдей ала ма, жоқ па, соны айтатын.

Бұл кісі әрбір магнетизер өзінің магнитты өрісі арқылы күніне үш-төрт адамға қызмет көрсете алатынын, соңғыларға қарағанда алдыңғыларға аз ықпал ететіні, өйткені, күші сарқылып қалатыны туралы айтты. Көп сырқаттарды қабылдау үшін ол жын-перілерден күш алуы керек. Сондықтан ол әр күні ауруларды өзінің қажетіне қарай қабылдайтын болды. Ол ешқашан магнит күшінің жетімсіздігін сезінбеді, өйткені, оған “басшысы” бас-көз болып, қанша керек болса, сонша күш беріп тұрды. Біз әйеліміз екеуіміз осы отбасында болып, олармен бірге Құдайға құлшылық еткенде, оның әйелі де жан-тәнімен Құдайға мінәжат етті. Сол күннен бастап оның күйеуіне науқас адамдар келуін тоқтатты. Содан кейін оның әйелін спириттер жиынынан қуып жіберді. Осындай жағдай он төрт күнге созылды. Бұл әйел бізді спиритистердің бас қосуына шақырып, оның барлық мүшелеріне болған жағдайды айтып беруімізді өтінді. Құдайға тәубе, бұл қоғамның мүшелерінің бәрі осы бас қосудан бас тартты. Олардың үйірмелері тарап, көптеген спиритистер біздің жиналыстарымызда құтқарылуға әрекет етті”.

Бұл айтылғандардан көз байлау (гипноз) және магнетизммен айналысудың қандай қатерлі екені байқалады.

Қауіпті эксперименттер

Кейде осы мәселелер туралы дәрістерді тыңдап отырып-ақ дүлей күштің қармағына түсіп қалуға болады. Бұған біз төмендегі хаттарды оқу арқылы көз жеткізе аламыз:

“Өткен жылы қалада көз байлау, спиритизм туралы дәрістер оқылған еді; кәдімгідей толық дәрістер сериясы болып өтті. Мен қатысқан алғашқы дәріс көз байлаушылық жайында болды. Залға кіре берісте мен өзімнің визиттік кітапшамды тастап кеттім. Көз байлаушы “экспериментті” бастап, келушілерді даярлау үшін бәріміздің соған қарап отыруымызды, еркімізді өзіне беруімізді, қолымызды бірінің үстіне бірін салып, оның аузынан шыққан сөзіне құлақ асуды өтінді. Біршама уақыт өткен соң, тәжірибеге қатысушылар қолдарын бір-бірінен айырып ала алмай қалды. Көз байлаушы ең басты мақсатына – байланысқа (контактқа) жетті. Содан соң арамыздан жеті адамды алып, тәжірибесін жалғастыра берді. Ол әлгілерді ұйықтатып тастады да, білгенін істеді. Мен бұған таң-тамаша қалып, үйге келген соң бұл туралы сенуші үш апайыма айттым. Олар мұның шайтанның ісі екендігін айтты, бірақ мен бұл сөзге сенбедім. Төсекке жатқаннан кейін көп уақытқа дейін ұйықтай алмадым. Бір мезгілде бөлменің есігі жер сілкінген кездегідей сықырлай бастады. Мен көрші бөлмеде жатқан апайыма: “Бұл не?” – деп айқайлады, ал ол болса: “Білмеймін”, - деп жауап берді. Есік одан да қатты селкілдей бастады. Мен керуеттен ұшып тұрып, шам жақтым. Одан жағдай өзгере қоймады. Зәре құтым қашқан мен: “Құдайға құлшылық ет!” – деп әпкеме айқай салдым. Ол Құдайға сиына бастады, бірақ бәрі де бұрынғы қалпында қалды. Содан соң ол Киелі кітапты ашып, Құдай оған көрсеткен тұсты оқыды. Оқылғаннан мен ештеңе түсіне алмадым, ол оқып отырғанда біреулер үйдің маңында аласұрып жүргендей болды. Бұдан кейін әпкем Қолостықтарға жазылған хаттың 2-тарауының 8-аятын тағы да қайталап оқыды, онда: “Қайдағы біреу пәлсапасымен, пайдасыз ілімімен сендерді баурап алмасын, байқандар! Адамдар ойлап шығарған аңызға негізделген ондай ілім Мәсіх туралы емес, әлемдегі тұрпайы

рухани күштер туралы үйретеді”, - делінген. Осыны естіген кезде мен өзімді шайтанның алдауына түскенімді ұқтым. Денемде электр тогы жүріп өткендей болды да, күнәға батқан мен шайтанмен шайқасып бақтым. Осы кезде әпкемнің: “Иса Мәсіхтің атымен шайтан саған әмір етемін, одан аулақ кет, қаранды өшір!” – деген дауысын естідім. Сөйтіп, дүлей күш зым-зия жоқ болды. Осыдан кейін әпкем және тағы бір сенуші адам үшеуіміз бірге мінәжат етіп, шайтанның шыр-мауынан босата гөр деп Құдайға жалбарындық. Келесі күні кешке, бәріміз менің бөлмемде отырғанымызда, шайтан найзағай болып кіріп, мені селкілдете бастады. Менің сенуші досым бұл жолы да Мәсіхтің аққан Қаны атынан шайтанға тыйым салды. Құдай біздің мінәжатымызды естіді, енді мен шайтанның өктемдігінен азатпын”.

Адамдардың көпшілігі барлығына қатыссам, бәрін көріп-білсем деп ойлайды. Мұндайларды қандай қасірет күтіп тұрғанын мына әңгімеден көруге болады. “Шайтанға саусағыңды берсең, ол қолыңды қолқамен қосып суырып алады”, - деген мақал тегіннен-тегін айтылмаған. Бұл өмірден алынған ақиқат. Бірақ шайтан бір қолыңмен қанағаттанбайды, ол жаныңды да, тәніңді де қолына түсіргенше тағат таппайды. Сондықтан біздер түрлі “өзірліктер”, дәрістер, тәжірибелерден сақтануға тиістіміз. Тозақ оты жуық арада жағылатынын түсін. Шайтанның шырмауына түсу оңай. Ал мұның аяғы әркімге ауыртпалық арқалатады.

Көз байлау (гипноз)

Көз байлаушылықтың көпшілік адамдар ойлайтындай зазалсыз іс еместігін Саксониядан келген мына хаттан көруге болады: “Соғыс кезінде мен ашаршылықтың салдарынан жүйке ауруына шалдықтым. Күш-қуатымның сарқылғаны соншалық, қызметімді атқаруға да шамам келмеді. Көптеген дәрігерге қаралып, олардың айтқан ақыл-кеңестері бойынша емделдім, бірақ жағдайым жақсармады. Содан соң таныстарым маған бір белгілі невропатологқа көрінуге кеңес берді. Мен оның емдеу әдісін сұраған жоқпын. Дәрігер мосқалдау,

сырт пішіні өте тартымды кісі екен. Ол маған менің қасіретімді жақсы түсінетін, өте ақылды адам секілді болып көрінді.

Алғашқы күні менің керуетіме келіп, ол менің өзінің көзіне қарауымды өтінді. Содан соң ол менің оң қолымды көтеріп, мені өзінің сөзімен дегеніне көндіре бастады: “Сіз маған қарайсыз, енді жаныңыз тыныштыққа бөлене бастайды. Мен қолымды маңдайыңызға салғанымда, сіз әбден тынышталып, қалжырайсыз да, ұйқыға кетесіз. Оянғаныңызда өзіңіздің сауыққаныңызды, күшіңіздің толғанын сезінесіз. Сіз қолыңызды қайыра қойғыңыз келеді, бірақ олай ете алмайсыз. Сіз қатты ұйқы құшағындасыз...” Оның айтқандарына менің күлкім келді, өйткені мен ұйықтаған жоқ едім және өзімді тәуір сезінген жоқпын, ал егер керек етсем, қолымды қайта орнына қоя алар едім.

Дәрігер көз байлауды қолданған сәттен бастап, әрбір таңертеңгі төртте мені жын-шайтан қинап, ал түнде түсіме жаман түстер еніп, мазамды алды. Бір күні таңертең оянсам, бөлменің ішіне мүлде тыныштық орнағанына қарамастан, бүкіл жын-шайтан маған қарсы аттанғандай бойымды қорқыныш биледі. Дәрігер менің бұл жағдайымды көз байлағаннан кейін болған өзгеріс деп түсіндірді. Көп кешікпей бәрі орнына келетінін айтты. Оның сөзіне қарағанда, басқа ауру адамдар бұдан жапа шекпейтін көрінеді. Бірақ мен бұл сөзге қанағаттана алмадым. Әр таңды үреймен қарсы алып, Құдайға құлшылық етіп, мұның бәрінің нені білдіретінін және мені алда не күтіп тұрғанын білдіре гөр деп жалындым. Өзімді Оның қарамағына толықтай беретініме уәде еттім. Тек Ол мені дүлей күштен қорғаса болғаны. Әрбір көз байлау сеансы алдында мен Құдайға сиынып, маған мейірімділік жасай гөр деп жалбарындым. Жаман түс көрген кездерімде де: “Иса, маған көмектесе гөр!” – деп дауыстадым, содан кейін жын-перілер жоғалатын болды. Құдай менің мінежатымды естіп, кешікпей маған мына мазмұндағы жауапты жіберді: “Сен өз күнеларың үшін өкініш білдірдің және Тәңірге қызмет еткің келеді екен. Бірақ дұшпан сені өз жағына шығарып, билік жүргізуді ойлайды. Құдай мұны қаламайды, егер көз байлаушыға баруыңды тоқтатпасаң, кімнің билігінде

болатыныңды Құдай саған үрей арқылы көрсетеді”. Мен бұл жауабы үшін Тәңірге ризалық білдіремін. Өзімнің сеніміме байланысты, мен дәрігерге әлсіздігіме қарамастан, көз байлаушылықтың зардабы туралы түсіндіре алатынымды айттым. Ол мені күлімсірей тыңдағанымен, менің ойымды түсіне алмады. Мұнда тұрған ештеңе жоқ деп мені сендірмек болды. Бірақ мен мұның шындыққа жанаспайтынын сезініп, аруханадан кетуге бел будым”.

Құдай бізге еркін ерікті басқа біреуге табыс етуге берген жоқ, өйткені сол біреу біздің еркіміз арқылы өз өктемдігін кімге қалай жасайтынын да білмейміз. Құдай балалары өз еркі мен ақыл-парасатын Тәңірге тапсырып, тек Соған сенуге тиісті.

Спиритизм және оның зардабы туралы Шарлоттенбургтен келген хаттан оқып білуге болады: “Х. Мырза шешесін иектеген жын-шайтан жылдар бойы өзін алдап, арбап келгені туралы қорытынды жасаған еді. Мұның зардабы Х.-ның отбасында өте қатерлі болды. Әйелі түсініксіз бір аурудан мезгілінен бұрын қайтыс болды. Оның денесін қатты ауыратын қызыл дақтар жауып кетті. Оған ешкім көмектесе алмады. Спиритизмді зерттеп, сол туралы дәріс оқуды мақсат еткен бір мырза да осы сырқатқа ұшырады.

Бір әйелді осы ауру меңдегенде, мен одан: “Сиқыршылықпен айналысқан жоқ па едіңіз?” – деп сұрадым. Ол мұндай оқиға болғанын жасырмай айтты. Мен дереу науқастың бөлмесіндегі осы мазмұндағы бүкіл кітапты отқа жақтым. Оған бата беріп, дұға оқығаннан кейін, сырқаттың беті бері қарап, ол бойын жеңіл сезінді, ал келесі күні төсегінен тұрып кетті”.

Спириттердің Құдай Сөзін тыңдағылары келмейтіні қалыпты жәйт, олар мүлгиді немесе жиналған жерде есінеп, есінді кетіреді. Бойды меңдеп алған жын-шайтан денені тітіркендіріп, түрлі дауыстар шығаруға итермелейді. Бірде жас қыздың денесі селкілдеп, бірнеше сағат бойы тілі байланып қалғаны бар.

Өлгендерден сұрап отырып, бүкіл сауалға жауап беретін сәуегейлер де бар. Берлинде бал ашатын бір әйел болды, ол түрлі жынды шақырғаны үшін алатын ақысын есік

сыртына жазып қоятын. Сенуші адамдармен кездескенде, мұндай сәуегейлер нақұрыстанып кетеді. Бұл олардың ауыр, қадала қарауларынан немесе бекерден-бекер түкіре беретіндіктерінен, сенушілерге қарай қолдарын сермеулерінен байқалады.

Міне, осы айтылған әңгімелер спиритизммен айналысқандардың ақыр аяғы қандай сұмдық өкінішке әкеліп соғатынын анық көрсетеді.

Шайтан мың құбылып, бізге жарық періштесінің кейпінде де көріне алатынын бізге мына бір хат дәлелдейді. Онда елші Пауылдың, Лютердің және т. б. аруақтары қатысады деген оккультистер жиыны туралы айтылады. Бұлар оған түрлі түсініктемелер береді. Ең сұмдығы, олар осы бас қосуда біреумен ғана ісі болатындары туралы әңгімелейді. Ол біреу – Иса. Мұны қалай түсінуге болады? Олар өз қылықтарын Құдайдың қолдауымен істейміз деп сенеді. Сонда не болғаны? өйткені, өлгендердің әруағын шақыруға және олардан сұрауға Құдай тыйым салды емес пе? Шын мәнінде қай рухтың келетінін ешкім де білмейді.

“... Бірнеше сағат бойы дұға оқылғанына және жыр айтылғанына қарамастан бірде-бір рух келмеді. Бәрі ақыры не болады деп тосуға тиісті болды. Бүкіл қатысушылар “сенушілер” болуы тиіс, шүбә келтірушілердің кірмеуін өтінді. Медиум – 70 жастағы кемпір. Күнделікті өмірде ол қарапайым сөйлейтін, қатардағы әйел. Оның рух айтқан күрделі сөйлемдерді қалай жазатынына менің таңым бар. Мысал келтірейін: “Құдайдың, өздеріңнің өтеушілерің және Құтқарушыларыңның атынан сендерге менің – бауырларың Пауылдың рухы келеді. Тыңдап отырсыңдар ма? Мұнда бұл туралы дұрыс түсініктері жоқ адамдар бар. Сендер өздеріңнің қате көзқарастарыңмен еріншек, жылымшы болудан сақтаныңдар. Қымбатты жандар, Исаның әкесіне жақын жүріңдер, бақыт күні күліп тұрғанда, өздерің тілегендердің бәрі де болады, сендер мейірбанды, қанағаттанған жандарсыңдар, Иса Мәсіх арқылы қуанышқа кенелесіңдер; алайда сендердің үміттерің үзіліп, бақытсыздыққа душар болғанда досың көмекке келмесе, сендер бір нәрседен қорқып, күмәндана

бастайсыңдар. Сондықтан, менің сүйіктілерім, егер кейде айналаларыңа қара бұлт түйіліп келе жатса, Исаның әкесі арқылы күш алып, күнге қарай батыл қадам басуларың керек. Құдай сендермен бірге! Сау-саламат болыңдар!”

Елші Пауыл осылай айтар алар ма еді? Киелі кітап бойынша аз-кем ойлана білген адам мұның алдамшы, жалған екенін түсінеді. Шайтан неліктен өзін періште кейпінде көрсетіп, Пауыл елшінің атынан сөйлейді? Оның түк те құпиясы жоқ. Тірі Құдайды іздеген жандар осындай жолмен Мәсіх жолын қуушылардың ақиқат өмірінен және Құдай Сөзін қарапайым да дұрыс оқудан қол үзеді. Міне, оккультистер он бес жыл бойы бас қосуда. Егер олар дұрыс жолда болып, өз өмірлерін Тәңірге қызмет етуге жұмсаса, осы уақыт ішінде қаншама игілікті іс тындыруға болар еді. Амал не, олар шайтанның азғыруына еріп, шындықтан тайып, ақиқатты аяққа басты.

Теософия

Шайтан оккультистер секілді лорберян дегендерді де адастырып бағуда. Лорберяндар дегеніміз, періштелердің дауысын естиміз деп айтатындар, өздерінің әкесі-медиум Лорбердің кітабын “Ізгі хабардың жұқа дәптерлерінен” жоғары тұр деп есептейді.

Бір бауыр маған былай деп жазды: “Шайтан Тәңірге дұрыс өмір өткіземін деп ойша уәде бергендерді де тауып алады. Мұндайларға ол өздері ойлап тапқан теософия ілімін ұсынады. Оған қоса, ол бұл іздеушілерге олардың ауыр да жанқиярлық күресі үшін, табиғаттан тыс бақытты сәтті сый-сияпат етіп көрсетуге тырысады. Еркіндік пен азаттық – бұлар әрбір шынайы теософтың басты мақсаты. “Құпия хикая” (Даналық кітабы) мен “Жаңа селимнің” еңбектері (Лорбердің еңбектері) адамдардың Ізгі хабарға деген көзқарасын бұзады.

Менің басымда да осындай жағдайлар болды. Мен бірде медиумдардың ілімімен танысқан болатынмын. Оккультистік әдебиет арқылы мен көріпкелдермен, түс жорушылармен, спиритистермен байланыс орнаттым. Алғашында шайтан

мені өз қолыммен түрлі құлақтандыруларды жазуға итермеді, яғни, мен қолымды ұсынып едім, ол бүкіл денемді алып қойды. Шайтан майда тілімен мені спиритистерге медиум болуыма үгіттеп бақты. Перілер тіліме ғана емес, тәніме де иелік етті. 1920 жылы менің халімнің жаман болғаны сондай, тіпті мені есі ауысқандар үйіне жіберді. Өз бетіммен спиритизмнен құтылуға күшім жетпеді, ал бірде-бір оккультист маған көмектесе алмады. Ең үрейлі, қорқынышты сәт келді: шайтанның жүрегімді жаулап алғанын анық сезіндім. Шайтанның кебін киіп, мен жақындарымды, сондай-ақ Исаның атын келеке еттім. Нағыз тозақ азабы басталды. Перілер мені күннен-күнге азапқа сала берді. Осындай қиналыс кездерінде мен өз денемді жарақаттап алдым... Мені жындыханадан шығарғанымен, денсаулығым толықтай бұзылды, денемде әлсіздік пайда болды. Сөйтіп, мен үшін аспан патшалығы толықтай жабылды. Шайтан болса, өзінді өлтір деген “дана” ақыл берді. Бірақ күнделікті азапқа қарамай мен өмірді сүйгендіктен, оған бара алмадым. Құдайға тәубе, Оның қолы құтқарушылық қалыптан қайтпаған екен, Ол маған басқа өмір жолын ұсынды. Мен сенушілер қоғамына тап болып, Тәңірдің маған күш беретін сөздерін естідім. Алайда Құдай менің бұрынғы жағдайымды біледі ғой деп ойлағанымда, күйзеліске түсіп кететін кездерім де болды. Соған қарамастан жүрегіме әділетті Исаның аты терең ұялай бастады. Ақыр аяғында мен сенімге ие болдым. Жазып, айтып болмайтын неткен қуаныш десеңші! Тек бір Исаға ғана қызмет еткім келді. Енді былай деп толық айта аламын: “Ол тірі! Көп кешікпей Құдай Рухы менің көмегімсіз-ақ бүкіл жын-періні қуып, мені ауруымнан айықтырды. Мәсіхтің Қаны мен Оның Рухы көп жыл бойы нәтижесіз күрескен мені жын-перінің қыспағынан босатты. Әлсіреген денем араға бірнеше апта салып қайтадан қалпына түсті, дәрменсіздіктен арылып, мен мүлдем сауығып кеттім. Мәсіхтің құтқаруын керек етпеген оккультистер, теософтар, спириттер, көріпкелдер, магнитопаттар, көз байлаушылар туралы ойлағанда жүрегім сыздайды. Оларды алда қандай тағдыр күтіп тұр!

Тіпті қазірдің өзінде шайтан мені азғырмақ болады,

жын-шайтандар мені ұруға тырысады, бірақ олар дәрменсіз, өйткені, мен Мәсіхтің Қанымен құтқарылған жанмын!”

Спиритуализм

Тюрингиядан келген хаттан мынаны оқимыз: “Мен өз кәсібім бойынша бір сенушілер деп саналатын отбасымен танысқаныма дейін, жай адамдар тобына жататынмын. Олар болса, Құдайға құлшылық етіп, жиналыстарға қатысатын, тыныш өмір кешіп, қайғыға ортақтасатын. Бұл адамдар спириттер еді. Спиритизм маған бөгде іс секілді сезілсе де, онда құдайшылдық, жақсы бір нәрселер болуы тиіс деп ойладым. Бұл адамдар мені өздерімен бірге жиі ертіп жүрді, бір сенуші апай бұл күнә деп түсіндіргенше, шамамен бір жылдай уақыт бойы спиритизм бұғауында болдым. Төрт аптаға жуыққа созылған қиян-кескі күрес басталып, әйтеуір Құдайға тәубе, Ол мені құтқарып алды. Осы төрт апта ішінде мен бәрін екі түрлі көріп, екі жақты естідім, сол кезде менің санамда айналдамда не болып жатқаны түсінікті болды. Кешке, жиыннан кейін мені үрей билеп алатын болды, қараңғы бұрыштарда жарқ-жұрқ еткен бір нәрселер елестей бастады. Шынайы жарық дүниені көрсете гөр деп Құдайға құлшылық еттім. Мәсіх жолын қуушылар қауымына мүше болып ендім, енді Құдайдың мейірбандылығы мен сүйіспеншілігіне бөленгенім үшін Құдайға алғысымды айтамын”.

Спиритуализмнің кәдімгі спиритизмнің бір ерекшелігі – мұнда ешқандай тәжірибе жүргізілмейді. Жиындар діни жырлар мен дұғаларды айтумен, Киелі кітапты оқып, оқылған жерді түсіндірумен басталады. Тыныштық орнаған сәтте, транс жағдайындағы медиумдардың бірі орнынан тұрып, Жазбаны түсіндіре бастайды. Ол 10-30 минут сөйлейді. Әдетте олар былай деп бастайды: “Құдайдың сүйікті балалары, сендерде жан тыныштығы болсын. Мен мендерге Аспандағы Әкемнің Сөзін жеткізгім келеді”. Медиумдар Құдай періштесі, Көне Келісімнің пайғамбары, Мартин Лютер және тағы басқалар секілді болып сөйлейді. Мұндай бас қосуларға өздерін “Ақиқат жолының ұйымы” немесе “Эммаустың ұйымы”

деп атайтын алты медиум қатысады. Бұл алтаудың үшеуі – шешен-медиумдер де, ал қалған үшеуі – көріпкелдер.

Олар қатысушыларға қазіргі сәтте жиналыста не болып жатқаны туралы әңгімелейді. Мәселен: медиумның рухы өз қамқорлығындағы адамды қалдырады да, оның үстелінің жанында тұрған бөтен рух медиумге еніп, сол арқылы іс-қимыл жасай бастайды. Тек тұрақты мүшелері ғана қатыса алатын жиынға қатысушылардың айтуына қарағанда, оларға “Иса Мәсіхтің өзі” келетін көрінеді. Сол кезде бәрі де бата алу үшін бір-бірден жақындайды. Олар спиритуализмді таза рухани ілім ретінде көрсетуге тырысады және он екі шәкірттің есімін алған он екі бауырды Исаның өзі үйретеді деп сендіреді. Медиумдер де Киелі кітаптағы белгілі кейіпкерлердің есімдерімен аталынады. Иса Мәсіх шәкірттерін үш жыл үйретеді де, содан кейін олар жетілген деп саналады. Ал бұдан басқаның бәрі үзілді-кесілді жоққа шығарылады, өйткені олар білімнің бәрін медиумдар арқылы өз ұстазынан алды деп есептеледі. Бұдан әрі Құдай мұның бәрін адамзаттың жерде білім алуы мен түзелуі үшін жасауда деп айтылады. Медиумдерге тек білімді және жоғары рухани адамдардың аруағы ғана келеді. Спиритуалистердің міндетіне сондай-ақ медиумдар арқылы айтатын өлгендердің рухын Құдайға қарату жатады. Мынандай да жағдай болған. Кезінде ғибадатханаларда ұрлық жасаған, өлгеніне 200 жыл болған бір адамның аруағы медиум арқылы сөйледі. Кісі өлтірген біреудің аруағы да осылай еткен және т. с. с. “Бауырластарға” бұларды рухтармен бірге дұға жасау арқылы Құдайға әкелу туралы тапсырма берілген көрінеді. Құдай туралы естігісі де келмейтін рухтар бар. Бас қосуға әрқашан діни жолмен жүреміз деген сол бұрынғы рухтар келеді. Бұл рухтар басқа рухтарды да шақырады. Бірде сондай дүлей күшті рух келіп, медиумдардың біріне енеді. Сонда нақұрыстанған медиумды ұстап тұруға 4 медиум бауырдың күші зорға жеткен кез де болды. Осыдан соң ол 15 минут қозғалыссыз жатты. Барлық “бауырластар” мен жиынға қатысушылар жанның денеге қайта оралуы үшін дұға оқыған көрінеді. Рух медиумды босатқаннан кейін, ол

ештеңе болмағандай орнынан тұрды. Бірақ мұндай оқиғалар тек санаулы орталарда ғана болды.

Келген рухтарды “бауырластар”: “Сенің күнәнің кешірілуі мүмкін, олар қан сияқты қызыл болғанымен, оларды қардан да әппақ етіп жууға болады”, - деген секілді сөздермен қарсы алатын көрінеді. Рухтар көптеген және түрлі құпияларды да ашады.

Бірде бір әйел мені осындай жиынға шақырды. Ол әйелдің өзі дәрігерлер көмектесе алмаған көптеген сырқат адамдарды магниттің күші арқылы сауықтырған көрінеді. Ол ақы-пұлсыз емдейтіндіктен, адамдар оған толассыз ағылады екен. Мен сонда емделуге келген бір сенуші апайды да көрдім, ол мұнда тұрған ештеңе жоқ деген сыңай танытты. Ол мұнда бәрінің Иса Мәсіхтің атымен және дұғамен жасалатынын айтты. Ұйымның ұраны: “өзіңнің Құдай Тәңіріңді және өзіңе жақын адамдарды өзіңдей жақсы көр”.

Спиритуализмнің қаншалықты кең тарағанын мынадан көруге болады. Жиында айтылғанның бәрі стенография арқылы жазылып алынады да, кейін бұл дәріс көбейтіліп, таратылады.

Шайтанның кез келген жолмен адамдарды алдап-арбауға әзір тұратынын көрдіңіздер ғой. Адамдар мұны күнә деп ойламауы үшін, ол Киелі кітаптан, дұғадан сөздерді алып, Құдай Әке, Ұл және Киелі Рух атынан айтады. Бұдан ештеңе өзгермейді. Бәрібір осы күнә арқылы адам шайтанның шыр-мауына ілігеді. Тәңірім, бізге, шайтанның құрбандарына мейірімділік жасап, оларды өзің осы зұлымдықтан құтқара гөр!

Астрология

Мен сіздерді астрология, яғни жұлдыздар саласын зерттейтін ғылым туралы айтылған хатпен таныстырсам деймін:

“Осыдан біраз уақыт бұрын, - деп жазды бір әйел, - мен Берлиндегі астрологқа болашағымды біліп беруді өтініп хат жолдаған едім. Көп кешікпей одан жауап алдым. Бұл адам өмірімнің алғашқы жартысында менде бақыттың бол-

майтынын, ал оның есесіне өмірімнің екінші жартысында үлкен табыс пен баянды бақыт күтіп тұрғанын, ал қартайған шағымда менен асқан жан болмайтынын айтыпты. Ол менің өміріме қауіп төндіретін екі оқиға туралы айтыпты. Енді мен күндіз де, түнде де тыныштық табар емеспін. Оны іздегеніммен, таба алмай жүрмін. Киелі кітапты оқығаныммен, ештеңе түсінбеймін”.

Осы мазасыздық пен үрейдің өзі – астрологтардан алдағыны сұраудың күнә екендігінің жанды дәлелі емес пе?

Тағы бір хатты оқиық: “Сіздерде де көптеген адамдар спиритизммен айналыса ма? Бізде осындай жиырмаға жуық үйірме бар, тіпті кішкентай балалардың өздері осындай үйірмелерді ұйымдастыруда. Мұндай істердің зардабы қандай болатынын көрсетіп берген Құдайға біз ризамыз. Жақында бізде бір жас жұбайлар қонақ болды. Олар да шайтанның шырмауына түсіп қалғандардың бірі болғандарын айтты. Байғұс әйелді жынның айналдырғаны соншалық, ол есі ауысқандар үйіне түсіп қала жаздады. Сол кезде бірнеше сенуші адамдар олар үшін сиынып, ол ұзақ уақытқа созылған ішкі шайқастан кейін шайтанмен байланысын үзді. Ол өз әңгімесін аяқтағанда, оның көзі қуаныштан жайнап кетті. Енді шайтан маған түрлі жексұрын ой салса, өзім бірден Құтқарушыны шақырамын, сол кезде бәрі қалпына келеді”.

Құдайға шүкір, Мәсіхтің аты оккультизмнің құрбаны болғандарды жебеп, құтқаруда. Аспан астында адамдардың құтқарылуы үшін берілген бұдан өзге есім жоқ.

Шайтанның шырмауынан қалай құтылуға болады?

Бұл осы кітаптың соңында айтқалы отырған ең маңызды мәселе

Күнәні мойындау

Алдымен айтарым, сиқыршылық, бал ашу, арбаушылық

және тағы басқалар күнә болып табылатынын мойындауымыз керек. Ал бұл күнәлардың кесірі біз үшін аспанның қақпасын жауып, бізді мәңгілік азапқа түсіреді. Бұл туралы киелі кітапта қалай айтылғаны туралы тағы да естеріңізге сала кетейін. Леуіліктер кітабының 19-тарауының 31-аятында былай делінген: “Аруақтарды шақыратындарға істерің түспесін, сиқыршыларға да бармаңдар, өздеріңді олардың қорлауына бермендер. Мен, Тәңір, сендердің Құдайыңмын”.

Толығымен түсінікті болуы үшін, қосымша ретінде Леуіліктерден 20:6-27; Мысырдан шығудан 22:18; Заңдарды қайталаудан 18:9-13; Аяннан 21:18; 22:15-ші аяттарды оқыңыз.

Бұл жерлерде мұның Құдай алдында жексұрын қылық екені, күнә болатыны туралы айтылып, ал оны жасағандарды таспен атқылап, адамдар арасынан аластау және Жаңа Иерусалимге (Құдай Патшалығына) енгізбеу секілді жазалар қолданылатыны туралы жазылған.

Сондықтан тағы да атап көрсетемін: бәрінен бұрын мұны күнә, үлкен күнә деп мойындау қажет. Бірақ адамдардың көпшілігі мұны істемейді. Олар мұны ермек деп есептейді. Олармен осы жайлы әңгімелесе қалсаң, олар күлісіп, былайша жауап береді: “Бос сөз! Мұның күнәға қатысы жоқ. Бұл шайтаннан емес!” Басқалары болса: “Бұл білмегендіктен жасалған іс қой, олар ақыры мұндай сұмдық болады деп ойлайды дейсіз бе?” – деп жауап береді. Ал кейбіреулері – бұл тіпті де зиянсыз іс деп есептейді. Оның зардабының осындай болатынын кім білген! Мұны маған бір бауыр айтты... “Менің дүниеден өткен шешем осымен айналысып еді... Мұнда тұрған ешқандай жаманшылық жоқ...” Тіпті былай дейтіндер де бар: “Сиқыршылықты күнә дегеніңізге өкініш білдіруіңіз керек. Бұл елшілер арқылы жеткен киелі кітаптық айықтыру құралы ғой. Егерде сен оған сенетін болсаң, оның көмектесетіні бұған айқын дәлелі, себебі сауығуды Құдайдың атынан аласың ғой”.

Мұның бәрін зиянсыз әзіл немесе діни сауықтыру құралы деп есептейтін адам, шын мәнінде, бір кезде тәубесіне келуге тиісті. Менің айтайын дегенім, мұның күнә

екенін мойындамағандар және Құдайға жалбарынбағандар мәңгілікке шайтанның шырмауында қалады.

Құдай сөзі арқылы мен сіздерге бал ашумен, сиқыршылықпен айналысу – үлкен күнә, егерде дер кезінде тәубеге келмесңдар, онда сендерге Аспан Патшалығына жолдың жабылатынын дәлелдеуге тырыстым. Сондай-ақ сиқырлық оқуға құлақ асу, болашағымды біліп бер деп бал ашушыға бару, түрлі сиқыршылық формулалары мен құралдарды қолдану, мәселен: қолмен ауырған жерді сипалау, тұмар тағу және т. б. күнә болып табылады. Шыны аяқты айналдыру, аруақтарды шақыру арқылы о дүниеде не болатынын білмек болу да күнә. Сиқыршылықтың күнә екенін мойындағысы келгендер онымен айналыспайды. 13 санынан және жапалақтың дауысынан қорықпайды, тауып алған тағаны бақыт белгісі деп есептемейді және т. б.

Бұл істер сіздер ойлағандай зиянсыз емес. Өйткені, біздің бақытымыз бен игілігіміз тағаға емес, Құдайға байланысты ғой. Егер біз тағадан бақыт күтсек, онда бұл біздің Құдайға және Оның Әкелік қамқорлығына толық сенуіміз болып табылар ма еді? Ырымшылдықтың көзін жойыңдар! Бақытсыз деп саналған саннан қорқуды тоқтатыңдар! Жануарлар даусы мен түнерген бұлттардың суреттерінен қорқуды қойыңдар! Кемеліне келген сүйіспеншілік үрейге жол бермейді!

Шын мәнінде, дінге сенушілер арасында ырымшылдардың әлі де көп екені даусыз. Олар бұл туралы көп ойланбайды да. Олар тіпті түрлі ырымдардың қайдан шыққанын түсінуге тырыспайды да. Дегенмен ырымшылдық – шынайы сезімнің қас дұшпаны, солай болып қала да береді. Сондықтан, тағы да айтамын: ең алдымен, мәселенің негізі – елеулі, ауыр күнә туралы болып отырғанын мойындау қажет.

Тәубеге келу

Екінші қадам – осы күнәні мойындап, тәубеге келу болып табылады. Тәубеге келу деген не? Бұл деген, өз ойыңды толықтай өзгерту. Бұл тек әзіл, оның үстіне залалы жоқ әзіл деп ойлауға құқың жоқ; қайта Оны ренжіткенің, Оның қасиетті

Есімін елемегенің үшін Құдайдан кешірім сұрауға тиістісің. ҚұдайдыңҰлы – Иса Мәсіхтің Қаны бізді қандай күнәдан болса да тазартатыны үшін, біз Тәңірге ризалығымызды білдіреміз. Егер біз шын мәнінде тәубеге келе алсақ, онда Оның Қаны бізді сиқыршылық күнәсінен толық тазарта алады.

Мүмкін сен: “Мен өз еркіммен сиқыршыға барған жоқпын ғой. Мені бала кезімде біреу апарды. Мен өзіммен осылай болсын деп тілеген жоқпын”, - дерсің.

Ол да мүмкін. Бірақ бұл бәрібір күнә ғой, сенікі болмаса әке-шешеңнің күнәсі. Ал ақиқаты – бұл сенің еркіңнен тыс жасалғанымен, сен бәрібір шайтанның шырмауындасың. Шайтан – жан түршігерлік дұшпан. Сен қол астына өз еркіңмен немесе басқаның әрекетімен түстің бе, ол оған қарамайды. Оған бәрібір. Енді ол сиқыршылықтың күнәсі арқылы өзімен байланысқандарды азаптап, келеке етуде.

Адамдардың шайтанның шырмауына түскенін, сол арқылы оларды қырсық шалып, өздерін өздері өлтіруді ойлағанын көргенде, қаншама рет жүрек қайғыға толды десеңші! Бұл күнәнің мәнісі – бір кезде оны біреулердің сиқыршыға баруға ақыл бергенінен немесе бала кезінде бұл күнәға оны басқалардың кіргізгені деп түсінеміз. Біздің дұшпанымыз жын-пері – ақылсыз, ол жан қиналысының және мейірім жасаудың не екенін білмейді.

Шайтан тек бір нәрседен ғана – Иса Мәсіхтің Қанынан ғана қорқады! Иса Мәсіхтің Қаны – бұл кешірім мен күнәнің өтелуінің белгісі. Кімде-кім Исаны шақырса, сол барлық азаптан құтылады.

Сондықтан құтқарылуды Тоқтының Қанынан ізде және Тәңірден өзінің қымбат бағалы Қанымен сені тазартып, күнәңді өтеуін сұра.

Сенім және мінәжат

Құдайдан бізді қасиетті Қаның арқылы тазарт деп сұрауымыз жеткіліксіз. Мәсіхтің қаны бізді барлық күнәмізден тазартатынына толықтай сенуіміз де керек. Ефес 1:7-де жазылған Құдай Сөзіне сену қажет. Онда былай жазылған:

“Біздің күнәміз Сол арқылы және Оның Қаны арқылы өтеліп, кешіріледі. Мұны ол бізге өзінің шексіз мейірімділігінен береді”. Біздің мінғжатымыз Исаның Ғолғотадағы айқыш ағаш арқылы кәрі жыланның басын таптап, шайтанның күшін алғанына деген сенімге құрылуы тиіс. Киелі кітапта 36 мың уәде бар. Бірақ көпшілік адамдар үшін бұл уәденің ешқандай күші жоқ. Неліктен? Егер шайтанның біреуге: “Мұның саған қатысы жоқ, сен бәрібір өлесің”, - деп сендіруіне мүмкіндік берілсе, бұл байғұс Құдайдың уғдесіне құлақ қоймай, шайтанға көбірек сенеді. Сондықтан уәделер ондайларға ештеңе бермейді. Сіздер шайтанға сенудің арты не боларын ойланып көріңіздерші. Осы арқылы сіздер Исаны өтірікші атандырдыңыздар ғой. Ол осыған лайық па еді? Ол: “Жол, шындық және шынайы өмір Менмін”, - деп айтқан жоқ емес пе? Құдайдың бүкіл уәдесі “иә” және “аумин” екені жалған ба еді? Шайтан әуелден өтірікші және өтіріктің атасы емес пе еді? Ол барлық жанды алдайды. Сендер мұны байқамадыңдар ма? Күнәға батырар алдында шайтан адамзатқа алтыннан тау тұрғызып беремін деп уәде етеді, ал ол жетегіне еріп, күнәға батысымен, ол адамды келемеждей бастайды: “Сенің күнәң тым көп, енді оған кешірім жоқ”, - деп қорқытады. Бұл барып тұрған сұрқия алдамшылық. Ал сенің осы алдамшыға сенгің келе ме? Оның аты сен үшін Тәңіріміздің Атынан да артық болғаны ғой. Иса Мәсіх былай деді ғой: “Маған келгенді ешқашан қумаймын. Мен оларға мәңгілік өмір беремін, сонда олар ешқашан құрымайды және ешкім оларды Менің қолымнан тартып алмайды”.

Сенің кімге сенгің келеді? Шайтанға ма, әлде өзіңнің Құтқарушыңа ма? Шайтанды таңдауыңмен, сен өз Құтқарушыңды өтірікшілердің қатарына қоятының саған белгілі болсын. Шынымен осылай жасағың келе ме?

Сен ақиқатқа сенесің ғой, Исаның: “Жүзеге асты!” – дегеніне де сенесің. Оның Қанымен күнәміз өтеліп, кешірілді. Ол оны бізге өзінің шексіз мейірімділігінің арқасында берді, - деген елші Пауылдың куәлігіне де сенесің. Өз Құтқарушыңа сен! Ол сені алдамайды. Ол тек ақиқатты айтады. Өзіңді Оған тапсыр! Біздің Тәңіріміздің Аты мәңгілік!

Шайтанмен бұдан былай байланыса көрме. Оның сөзіне құлақ салма. Жақып былай деді: “Құдайға бой ұсынып, жын-періге қарсы тұрсаң, ол сенен іргесін аулақ салады”. Шайтан сені арбамақ болса, оған: “Киелі Жазбада былай жазылған ғой...”, - деп нақты жауап бер. Тәңірдің атын атасаң, шайтан сені еріксіз жайыңа қалдырады.

Сөйтіп, өзіңді алдайтын шайтанның сөзіне сенбе. Құтқарушыңа сен, өйткені, Ол – Ақиқат және шындықты айтады.

Мінәжат арқылы қолдау

Алайда тағы бір өкінішті нәрсе бар: біз күнәміздің кешірілгеніне сенімді болсақ та, баяғы ескі “менмендік” бізді қайтадан күнәға тартады. Ежелгі байланыс қайтадан жалғасады. Мұндай жағдайда не істеу керек?

Жақып пайғамбар бізге былай деп кеңес береді: “Сондықтан сауығып кету үшін, жасаған күнәларыңды бір-біріңе айтып мойындап, бір-бірің үшін сиыныңдар! Әділ адамдардың Құдайға сиынуларының күші орасан зор” (Жақып 5:16). Шайтанның шырмауынан өздігінен құтыла алмайтындар, өз қылығы жөнінде Мәсіх жолын қуушы бауырласының алдында тәубеге келіп, күнәсін мойнына алсын, сөйтіп туыстарымен бірге мінәжат етсін.

Иса бірлесіп жасалған мінәжатқа айрықша бата беретіні туралы уәде етті: “... жер бетінде екеуің келісіп, қай нәрсені болса да көктегі Әкемнен сұрасаңдар, Ол соны бермек. Өйткені екі-үш адам Менің атымнан жиналса, Мен де сол жерде араларыңда боламын” (Матай 18:19-20).

Осындай бірлесіп мінәжат етуге ұмтылыңдар. Мұны барынша жиірек жасау қажет. Кейде мұндай бірлесіп мінәжат ету уақытша ғана көмектесіп, содан соң тағы да дұшпан өктемдігі адамға бой көрсете бастайтыны бар. Ондай жағдайда мінәжатты қайталаған жөн. Бұл қатты ауырғандағы жағдаймен бірдей. Дәріні бір рет қана қабылдап қойған жеткіліксіз. Сырқаттың беті бері қарағанша, емді бірнеше рет жасау керек.

Ораза ұстау

Иса Мәсіх былай дейді: “Мұндай жындарды тек Құдайға сиынып, ораза ұстаумен ғана қуып шығуға болады”. Мұның мәнісі – дүниеден оңашаланып, ұзақ уақыт мінәжат ету арқылы жоғарыдан күш алу деген сөз. Көптеген адамдар Құдайдың құдіретімен, шынайы Мәсіх жолын қуушылармен байланыс жасаудың арқасында шайтанның шырмауынан босатылды. Егер мүмкін болса, Құдай сөзі күшінде тұрған жерде жиірек бол.

Қол жайып мінәжат ету

Қол жайып мінәжат етіп, бата беруді өте бағалаймын. Бұл дұшпан – шайтанмен байланысты үзудің ең бір жақсы құралы екендігіне ертеден-ақ көзім жетті.

Алғыс айту, ризашылық

Шайтан шырмауындағы адамды көбінесе Құдайға қарсы ой мазалайды. Ал бұл ойдан қалай арылуға болады? Бұл жерде мынадай ақыл-кеңес бергім келеді. Әрине, өзіңнің жүрегіңнен шықпаған осындай ой мазалай бастаса, сол сәттен бастап мүлдем басқа нәрсе туралы ойлау керек. Фолготадағы айқыш ағашты, онда жүзеге асырылған құтқарылуды есіңе түсір. Осы құтқарылу үшін Құдайға мадақтау сөздерін айт. Былай деп жазылған ғой: “Кімде-кім мадақтаса, ол мені есіне алып, сыйлағаны. Кім өз жолын бақылап дұрыс жүрсе, Мен оған Құдайдың құтқаруын әкелемін” (Зғбүр 49:23). Киелі Жазба бізді ұдайы алғыс айтуға шақырады. Пауыл: “Әрқашан және бәрі үшін біз Құдайға ризашылық білдіруге міндеттіміз”, - деп өсиет айтқан (Ефес 5:20).

Біз құтқарылғанымыз үшін айтқан алғысымыз арқылы, Құдайға қарсы ойларға кедергі келтіретінімізге сенімдімін. Біз Құдайды мадақтап, алғыс айтқан сайын, дұшпан күшін жоғалтады. Қай уақытта болсын Тәңірге ризашылығымызды

білдіруге үйренейік. Біздің айқыш ағаш қасында тұрғанымызды көрген шайтанның зәре-құты қалмай қашатыны белгілі.

Исаның атын атап шақыру

Егер саған Құдайға қарсы ой аяқ астынан келіп, мінәжат етуге мүмкіндік болмай қалса, Исаның атын атап шақырсаң жетіп жатыр. Бұл өте қысқа әрі ұтымды мінәжат болып саналады. “Тәңірдің аты – сенімді қорған”, - деп жазылған ғой. Сен шын жүректен Исаның атын атасаң болды, сенімді қорғандамын дей бер, өйткені дұшпан сені қанша әурелесе де қолға түсіре алмайды. Мінәжат ете алмасаң – Исаның атын ата, сонда дұшпанның сенен алыстағанын көресің. Осындай әдісті жиі қолданған сайын, сен оған қарсы тұрасың және оның ықпалы саған жүрмейтін болады.

Құдайға қарсы ойларды айтпау

Сонымен қатар, сен бір нәрсені естен шығармауың керек – Құдай бәрін біледі. Ол өзіне қарсы мұндай ой сенің жүрегіңнен шықпағанын, мұндай ойды сенің жек көретініңді біледі. Бұл үшін сен жауапты емес екеніңді де Ол біледі. Тек оны дауыстап айтпасаң болғаны. Ешқашан. Кейбір адамдар маған өздерін осындай ойлар мазалайтынын, бірақ олар сақтық жасап, оларды қағазға жазбағандары туралы айтқаны бар. Ал біреулері абайламай, бұл жексұрын ойларын жазып алған көрінеді. Бұл ойлар есімде қалмас үшін, менің тезірек Исаның Қанына жүгінуіме тура келді. Қағазға жазылған және дауыстап айтылған бұл ойлардың күшіне енетіні белгілі. Сондықтан Құдайға қарсы ойды дауыстап айтудан сақтаныңыздар!

Сиқыршылықтың заттарын және кітаптарын құрту

Осыған байланысты тағы бір ақыл айтайын: сиқыршылықтық бүкіл құралдары мен мұндай тақырыпқа жазылған кітаптар отқа тасталсын! Пауылдың кезінде Ефе-

сте, бірде ояныш болған кезде, “Сенушілердің көбі келіп, жасаған күнәларын ашық мойындады. Бақсы-балгерлікпен айналысатын бірсыпыра адам сиқырлық кітаптарын әкеліп, көпшіліктің алдында өртеп жіберді. Кітаптардың құнын есептегенде, елу мың күміс теңге болды” (Ел. іс. 19:18-19).

Егер сенің үйіңде осындай заттар болса, бәрін отқа жақ! Бойтұмарларың бар болса, оларды да сақтама, өрте. Түс жоритын кітаптарды да өрте. Егер үйіңе кіре берісте таға ілулі тұрса, оның да көзін жой. Егер бал ашатын картаң немесе аруақтарды шақырғанда пайдаланатын қағаздарың болса, оны да отқа таста. Жұлдыз жорамалды да үйде қалдыруға болмайды. Сиқыршылықпен байланыстының бәрінің де көзін құртуың керек. Сөйтіп, дұшпаныңмен байланыстыратын ең соңғы жіптің үзілуі қажет.

Киелі кітапты тұрақты түрде оқу

Жын-перімен өзіңді байланыстыратын соңғы жіпті үзген соң, сен Құдаймен тығыз байланысты күшейтуге тиістісің. Құдай сенің өміріңе енуі керек, ал бұл үшін, сенің ең алдымен күн сайын Киелі кітапты оқығаның жөн.

Ал бұған сенің былай деп жауап беретініңді алдын ала біліп отырмын: “Киелі кітап маған түсініксіз, бұл мен үшін жұмбақ кітап. Оны оқыған сәтте менің жүрегімде “күрес” басталып, Құдайға тіл тигізетін ойлар келеді. Ал бұл күресті болдырмас үшін, менің Киелі кітапты оқымағаным абзал”.

Дұшпаныңның не тілеп отырғанын байқаған боларсың? Ол сені жанымыздың азығы – Киелі кітаптан бұрып алып кетуді аңсауда. Кімде-кім Киелі кітапты күн сайын оқыса, сол арқылы күнәмен күресетін күш жинай алады. Шайтан Киелі кітапты оқуға уақытым жетіспейді деген сылтауды айтқызуға тырысып бағады. Әзәзілдің бұл айлар-шарғысына нақты, қатаң ережені қарсы қойған жөн.

Күніне үш рет тізесін бүгіп, Құдайға құлшылық етуді Даниелден үйренейік. Ол мұны әдетке айналдырған болатын. Ол мұнысы үшін өзін айыптап жатқанына да көңіл аудармады. Мінәжат ету әдеті оның қорғанышына айналды. Міне, бұл

қорғану тәсілі бізге де қажет. Осылай етсек, дұшпан Киелі кітапты оқуымызға кедергі жасай алмайды.

Киелі кітапты белгілі бір уақытта, бәрінен дұрысы – ертемен оқуды әдетке айналдыруымыз қажет. Киелі Рухтан Сөздің мәнін ашуды, сенің оны түсініп, өмірде қолдана алуыңды сұра. Сонда сен көп кешікпей Зәбүр жазушымен бірге: “Сенің Сөзің – менің жолымның шырағы”, - деп қосыла айта аласың. Киелі кітапты үздіксіз оқу өміріңнен мықтап орын алатын болсын.

Мінәжат етудегі тұрақтылық

Киелі кітапты оқу мен мінәжат етудің қатар жүргені дұрыс. Бұл, әрине, саған қиын, шайтан аузыңды жауып, бүкіл ойыңды араластырып жібергендей болып көрінуі мүмкін. Мінәжат етіп отырғанда көзіңе ұйқы тығылуы да ғажап емес. Егер осылай болып бара жатса, мінәжатты дауыстап оқуға тырыс. Мінәжатты әдемі оқу жағын ойламай-ақ қой. Мәселе әдемі сөздерде емес: Құдай жүрегіңе үңіледі. Егер мінәжатың жатық болмай жатса, оның оқасы жоқ. Шын жүрегіңмен мінәжат ет. Құдайға ойыңдағы ауыртпалықтың бәрін айт.

Егер қалай мінәжат ету керектігін білмесең, Құдай Сөзі саған көмектессін. Оқығаныңды мінәжатқа айналдыр. Құдай Сөзін оқып отырып, өзің: “Мен осындаймын ба? Менде осылар бар ма? Мен бұл туралы білемін бе?” – деген сауалдарды қой. Егер сен ондай болмасаң, онда мұны мінәжаттың негізі етіп ал. Сөйтіп, сен Киелі кітаптың көмегімен мінәжат етуді үйренесің.

Сенушілермен қарым-қатынаста болу

Сенушілермен қарым-қатынаста бол. Егер сен тұрған жерде қауым болса, сонда барып, ондағылардан өзіңмен бірге мінәжат етулерін өтін. Егер жақын маңда қауым болмаса, онде сенушілермен жақындаасудың кез келген мүмкіндігін пайдалан, олармен бірге Киелі Жазбаны оқып, мінәжат ет. Бұл жаныңды сергітіп, нығайтатынына әлі көзің жетеді. Егер жақын жерде сенушілердің қауымы немесе

Киелі кітап үйірмесі болмаса, онда діни әдебиеттерді оқы, конференцияларға қатыс. Бұған қазіргі кезде әркімнің қолы жетеді.

Дегенмен, ең бастысы - Исаға жақын бол. Исаның жын-пері туралы айтқан мысалын еске түсір, үйден шығып, сусыз жерлерді кезіп келген ол шыққан үйіне қайтып оралғанда, үйдің сыпырылып, жиналғанын көреді. Сонда ол қайта барып, өзінен де қатігез жеті жынды өзімен бірге алып келеді; сөйтіп адамға соңғысы алдыңғысынан да жаман болып көрінеді.

Бұл мысал бізді сақтандырып, біздің Исамен бірге, Оның Киелі Рухының ықпалында болуымыздың қажет екенін ескертеді. Егер біз қорғанышсыз қалсақ, дұшпан қайта оралып, ескі әніне қайта басады.

Құдаймен одағымыз

Шайтанның шырмауынан құтылғың келсе – Құдаймен одақты нығайт, әр уақытта онымен бірге бол. “Иса, мен сенікімін, ал Сен – менікісің. Менің жүрегіме ен, ақтық деміме дейін бәрін де Сенімен бірге атқарғым келеді”, - деп мінәжат ет. Шайтанның шырмауынан босануға болады, бұл үшін күш жұмсау қажет. Мұны көптеген куәлер де растайды. Міне, солардың бірі:

“Осыдан он екі жыл бұрын мен әуестіктің арқасында қартамен бал ашушыға барған едім. Ал төрт жыл бұрын маған тілме ауруын дуа арқылы жазып берді. Бал аштырғаннан кейін араға біраз айлар салып, аяқ астынан басыма өзімді-өзім өлтіру туралы ой келіп түсті. Содан ешбір үйдің төртінші қабатынан секіре де жаздадым. Сол кезден бастап осы ойдан арыла алма-ақ қойдым, мұның қауіпті болғаны сонша, тіпті кейде осы алпарыста есімнен айырылып қаламын ба деп қорқатын болдым. Ал сыртынан қарағанда бәрі тыныш секілді, тіпті тамаша десе де болады. Өзімді-өзім өлтіру туралы соңғы ой өткен жылдың тамыз айында келіп, сол кезде мен суға кетпек болдым. Сол кезде мен адамды кісендеп, уысынан шығармайтын дүлей күш туралы оқыдым және естідім. Мен қатты тынышсыздандым, жаным жай таба алмай, күні-

түні дұға оқыдым, әйтпегенде, мен ақылымнан айырылып, өзімді-өзім өлтіретін едім. Бірде, ұйқысыз өткен түнде, маған Құтқарушы келді: мен кенет селт етіп, тіпті менің денемнен шырмаудың қалай түскенін сезіндім. Сөйтіп, маған көптен күткен тыныштық орнап, мен сауыққынымды кәдімгідей сезіндім.

Содан бері мен басқа адаммын, Тәңірімнің қорғауында екенімді сезіндім, ашуды, сабырсыздықты жеңер күшті Сол... Енді өткеніме мақтанышпен және ризашылықпен көз тастап, болашығыма үмітпен қараймын. ”

Аудармашының соңғы сөзі.

Адамзат баласының бойында баға жетпес бір асыл байлық бар. Ол – денсаулық. Халқымыздың: “Әуелгі байлық - денсаулық” деуі де сондықтан болар. “Дені саудың – жаны да сау”, - деген мәтелдің де мәні осыған саяды. Бірақ бізді қоршаған ортадағы экологиялық ауыр жағдай, басқа да қиын тіршілік түйткілері ет пен сүйектен жаралған адамның басын ауыртып, балтырын сыздатпай қоймайды ғой. Осындайда “басқа түскен баспақшыл” демекші, денсаулыққа дем берер, ажалға араша тұрар адамды іздейміз. Міне, пастор Эрнст Модерзонның, қолыңызға ана тілінде тиіп отырған, “Шайтанның шырмауында” деген кітабы, осы “баспақшыл” басқышында сіздерді өзәзілдің “шырмауына” түсіп қалудан сақтандырады.

Кітап осыдан тұп-тура жетпіс жыл бұрын жарық көргеніне қарамастан, бүгінгі оқырманның да ойынан шығады деген ниеттеміз. Қай дін болмасын – шайтанның қылығына қарсы. Құран хатімнің: “әһүзу билләһи минәшайтанир ражим”, яғни “ей Құдайым, таспен атып құлатқан шайтанның азғыруынан сақта” деп басталуы, тегіннен-тегін болмаса керек.

Адамзат үшін ең қасиетті нәрсе – ар. Адамның арлы, ақылының кемелді болуы, оның рухани тереңдігіне, адамгершілігіне және тәрбиесіне байланысты. Ал тереңдікті, арлылықты, тәрбиені діннің беретіні сөзсіз. Демек, “Шайтанның шырмауында” кітабы оқырмандарға ой салар дүние дей ала-

мыз. Кітапта айтылғандардың көбімен сіздер үлкендердің аузынан айтылатын аңыздар арқылы және өздеріңіз сүйіп оқитын “Мыңнан бір мезет” танымдық газетінен таныссыздар.

Сіздің бұл кітап туралы ой-пікіріңізді, әлде сұрақтарыңыз болса, бізге мына адрес бойынша жазыңыз:

480031 Алматы – 114
п/ж 68
“Шығыс сәулесі” баспасы

Эрнст Модерзон

Шайтанның шырмауында

Эрнст Модерзон 1870 жылы Зостада туып, 1948 жылы Бад Бланкенбургте қайтыс болды. Ол өз өмірінде 260 кітап пен кітапша жариялады. Ізгі хабарды уағыздаушы және пастор ретінде ол мұны өз еңбегінің маңызды да, жауапты бөлігі деп есептеді.

Бұл кітап – аспан мен шайтанның айқасы туралы. Автор өмірден алынған көптеген мысалдар арқылы бізге жын-шайтаннан болатын сан қауіп-қатер жөнінде айтады.

Эрнст Модерзонның бай тәжірибесі бұл кітапты байыта түсті және оқырмандарға өзәзіл күштерінің азғыру әдістерімен тереңірек танысуына мүмкіндік береді.

